

东坡全集

第二函
十一册

東坡集卷之四十七

尺牘

眉山蘇軾

東坡氏著

與司馬溫公五首

以下徐州

春末景仁丈自洛還伏辱賜教副以超然雄篇喜怵累日尋以出
京無暇比到官隨分紛冗久稽裁謝悚忤無已比日不審台候何
如某強顏苟祿忝竊中所愧於左右者多矣未涯瞻奉惟冀為國
自重謹奉啟問

某再啟超然之作不惟不肖託附以為寵遂使東方陋州以為不

朽之美事然所以獎與則過矣久不見公新文忽領獨樂園記誦
味不已輒不自揆作一詩聊發笑耳彭城佳山水魚蟹侔江湖爭
訟寂然盜賊衰少聊可藏拙但朋遊濶遠舍弟非久赴任益岑寂也

三 黃州

謫居窮陋如在井底杳不知京洛之耗不審邇日寢食何如某以
愚昧獲罪咎自己招無足言者但波及左右爲恨殊深雖高風偉
度非此細故所能塵垢然某思之不啻芒背邇寓居去江無十步
風濤烟雨曉夕百變江南諸山在几席下此幸未始有也雖有窘
乏之憂顧亦布褐藜藿而已瞻踣無期臨書惘然伏乞以時善加

調護

四 以下俱登州

某頓首孟冬薄寒伏惟門下侍郎台候萬福某即日蒙免罪戾之餘寵命逾分區區尺書豈足上謝又不敢廢此小禮進退恐慄未緣趨侍伏冀上爲宗社精調寢興下情祝頌之至謹奉啟不宣

五

某啟去歲臨去黃州嘗奉短啟爾後行役無定因循至今聞公登庸特與小民同增鼓舞而已亦不敢上問想識此意

與王荊公二首

某啟某游門下久矣然未嘗得如此行朝夕聞所未聞慰幸之極
已別經宿悵仰不可言伏惟台候康勝不敢重上謁伏冀順時爲
國自重不宣

二 離黃州

某近者經由屢獲請見存撫教誨恩意甚厚別來切計台候萬福
某始欲買田金陵庶幾得陪杖屨老於鍾山之下既已不遂今儀
真一住又已二十日日以求田爲事然成否未可知也若幸而成
扁舟往來見公不難矣向屢言高郵進士秦觀太虛公亦粗知其
人今得其詩文數十首拜呈詞格高下固無以逃於左右獨其行

義修飭才敏過人有志於忠義者某請以身任之此外博綜史傳
通曉佛書講習醫藥明練法律若此類未易以一二數也才難之
歎古今共之如觀等輩實不易得願公少借齒牙使增重於世其
他無所望也秋氣日佳微恙頗已失去否伏冀自重不宣

上呂相公

軾昨日面論邢夔事愚意本謂邢鼻是平人邢夔妄意其爲盜殺
之苟用犯時不知勿論法深恐今後欲殺人者皆因其疑似而殺
但云我意汝是盜卽免矣公言此自是謀殺若不勘出此情安用
勘司軾歸而念公言旣心服矣然念近者西京奏秦課兒於大醉

不省記中打殺南貴就縛至醒取衆證爲定作可憫奏已得旨貸命而門下別取旨斷死竊聞輿議亦恐貸之啟奸若殺人者得以醉免爲害大矣軾始者亦以爲然固已書過錄黃再用公昨日之言思之若今後實醉不醒而殺其情可憫可以原貸若託醉而殺自是謀殺有勘司在那夔犯時不知秦課兒醉不省記皆在可憫之科而刑夔臀杖編管秦課兒決殺似輕重相遠情有未安人命至重若公以爲然文字尚在尚書自可追改也

與張太保安道

翰林

某以不善俯仰屢致紛紛想已聞其詳近者凡四請郡杜門待命

幾二十日文母英聖深照情僞德音琅然中外聳服幾至有所行
譴而諸公變和之數日有旨與言者數君皆促供職明日皆當見
蓋不敢堅臥嫌若復伸前請爾蒙知愛之深不敢不盡幸爲察之
褊淺多忤有愧教誨之素臨書悒悒

荅范蜀公十一首

徐州

前日展書并新詩累幅詞格清美欽味不釋手屬使者交至紛紛
無暇裁荅後時再領手教愧悚無地比日起居何如未由披奉萬
萬以時自重

二 以下俱黃州

李成伯長官至辱書承起居佳勝甚慰馳仰新居已成池圃勝絕
朋舊子舍皆在人間之樂復有過此者乎某凡百粗遣春夏間多
患瘡及赤目杜門謝客而傳者遂云物故以爲左右憂聞李長官
說以爲一笑平生所得毀譽殆皆此類也何時獲奉几杖臨書悵

悵

三

蒙示論欲爲卜隣此平生之至願也寄身函丈之側旦夕聞道又
況忝姻戚之末而風物之美足以終老幸甚幸甚但囊中止有數
百千已令兒子持往荆渚買一小莊子矣恨聞命之後然京師尚

有夢券緡若果許爲指揮從者幹當賣此業可得八百餘千不謂
可納左右百所賜手書小字如芒知公日益明此大慶也某早衰
多病近日亦能屏去百事澹泊自持亦便佳健異日必能陪從也

四

承別紙示諭麴蘖有毒平地生出醉鄉土偶作祟眼前妄見佛國
公欲哀而救之問所以救者小子何人顧不敢不對公方立仁義
以爲城池操詩書以爲干櫓則舟中之人盡爲敵國雖公盛德小
亦未知勝負所在願公宴坐靜室常作是念當觀彼能惑之性安
所從生又觀公欲救之心作何形段此猶不立彼復何依雖黃面

瞿曇亦當斂衽而況學之者耶聊復信筆以發公千里一笑而已

五

顛仆罪戾世所鄙遠而丈丈獨賜收錄欲令撰先府君墓碑至爲榮幸復何可否之間而不肖平生不作墓誌及碑者非特執守私意蓋有先戒也反覆計慮愧汗而已仁明洞照必深識其意所賜五體書謹爲子孫之藏幸甚幸甚無緣躬伏門下道所以然者皇恐之至

六

以下俱翰林

日望旌旆之至不敢復上問不謂高懷超然不屑世故堅臥莫致

有識悵惘然孤風凜然足以下激頽靡雖非落落可指之功其於
二聖忠厚之治所補多矣此日履茲寒凝台候何如未由瞻奉伏
冀萬萬爲國自重

今七

某碌碌無補久竊非據又舍弟繼進皆以疎愚處必爭之地公議
未厭豈可久安非遠當乞一郡以自效或得過謁少聞誨語大幸
也始者竊意丈丈絕意軒冕然猶當強到闕一見嗣聖今乃確然
如此殊垂素望然士大夫甚高此舉也冗中不盡區區

外八

伏承歸政得請恩禮優異伏惟慶慰公孤風亮節久信天下而有
識今日尤復歸心勉強躉起以慰二聖之望幡然復退以安無窮
之福出處之間雍容自得直可以爲後世法矣官守所糜不獲躬
詣謹奉手啟區區萬一

九

今晚忽得報承子豐承事遽至大故聞之悲痛殆不可言美才懿
行期之遠到今乃止此士友所共痛惜而況姻戚之厚悲惋可量
丈丈高年罹此苦毒有識憂懸伏惟高明痛以理遣割難忍之愛
上爲朝廷下爲子孫親友自重不勝縷縷

近者子豐攜長子承務見過見其風骨秀整間向下二字益竒死
生壽夭皆常事惟有後可以少慰丈丈意幸以此自遣也

十一

子功淳父皆欲謁告省觀某恨不同往曉解左右臨書悽愴

與范子功六首

徐州還朝

違濶歲月書問不繼自咎之深殆無所容伏惟盛德雅度有以容
之比日竊計鎮撫之暇台候萬福某蒙庇粗遣驟遷過分備員無
補惟雅眷有以教督之乃幸毒熱伏冀順時爲國自重

二

久竦上問愧仰增劇承軒旆將至起居住勝欣慰不已
暫還舊席
卽膺柄用輿議所屬小子得少託餘庇尤爲厚幸區區卽遂面究

三 以下俱揚州選朝

見舍弟說知得雍信幼孫天逝聞之怛然便欲往見從者已散去
竊想慈念之深不能無動然竟亦何益惟千萬以理照遣且夕面
究

四

辱教承晚來起居住勝團茶及匣子香藥夾等已領玆感玆感栗

子之求不太廉乎便不得更送一箇筮離耶呵呵

五

宿來起居住佳勝已馳簡邀伯揚來日會啟聖公能枉纒甚幸子由
明日莫爵後便往啟聖公可到彼早食也某畧到押賜處便往

六

廣嚴之會謹如教計必請陳四也分惠佳茆感感獨飲一杯遂醉
書不成字

與范子豐八首

以下俱徐州

伏審子豐南宮殊徙慶抃可量即日想已唱第必在高等期集之

暇起居住佳勝某更五七日泝汴愈遠左右臨書悵然惟祈慎重別
膺亨寵

二

小事拜聞欲乞東南一郡聞四明明年四月成資尚未除人託爲
問看回書一報前所託殊不蒙留意恐非久東南遂請逾難望矣
無乃求備之過乎然亦慎不可汎愛輕取也人還且畧示謝

三

近惠人奉狀達否卽日起居何如貴眷各安局事漸清簡否某幸
無恙水旱相繼流亡盜賊並起決口未塞河水日增勞苦紛紛何

時定乎近乞四明不知可得否不爾但得江淮間一小郡皆所樂
更不敢有擇也子豐能爲一言於諸公間乎試留意人還仍乞一
報幸甚奉見無期惟萬萬以時自重

四

稍不通問伏想起居住勝侍郎文必在郊外過夏台候必更康安
某此與幼累如常八月九月間秋水旣過彭城城下徹備高麗使
已還四明可以易守當更理前請也會合杳未有涯萬萬自重

五

南方夏熱殊非中原之比入秋稍得清涼然夏田旱損七八鹽法

更變課入不登雖閒局不免以此爲累自餘粗如常也子中子老
頃在左右今已赴官未何時叅候北望不勝馳情

六

新珠想日長進愛婿無恙甚望丈人高等待乞利市也納銀一笏
託用買圓熟珠子二千枚少錢告那出便納上婚嫁所須不可柰
何甚非情願幸留意承問似叔頗長成每自作詩讀史但蒙拙少
訓督耳內孫想益聰淑諸郎娘亦計安也

七 以下黃州

黃州少西山麓斗入江中石室如丹傳云曹公敗所謂赤壁者

或曰非也時曹公敗歸華容路多泥濘使老弱先行踐之而過曰
劉備智過人而見事遲華容夾道皆葭葦使縱火則吾無遺類矣
今赤壁少西對岸卽華容鎮庶幾是也然岳州復有華容縣竟不
知孰是今日李季秀才來相別因以小舟載酒飲赤壁下李善吹
笛酒酣作數弄風起水湧大魚皆出上有栖鶻坐念孟德公瑾如
昨日耳適會范子豐兄弟來遂書以與之

八

臨臯亭下不數十步便是大江其半是峩眉雪水吾飲食沐浴皆
取焉何必歸鄉哉江山風月本無常主閒者便是主人問范子豐

新第園池與此孰勝所不如者上無兩稅及助役耳

荅范純夫十一首

湖州

向者深望軒從一來而還領手教知徑赴治實增悵惘比日起居
佳勝日對五老想有佳思此間湖山信美而衰病不堪煩但有歸
蜀之興耳未由會集千萬以時自愛

二 翰林

三辱示論鄙意不移公休之餽人子之心也不肖之辭夙昔之分
也某已領其意而辭其物物有齊量意豈有窮哉昔人已聘還圭
璋庶幾此義

荆楚三司以下俱揚州

到賴半年始此上問懶慢之罪跼蹐無地中間辱書及承拜命貳卿亦深慶慰然公議望公在禁林想卽有此拜也春暖起居信如某移廣陵甚幸舍弟欲某一到都下乞見而行路旣稍近而老病務省事且自賴入淮矣不克一別臨書惘惘

四

某衰病日侵而使客旁午高麗復至公私勞弊殆不能堪但以連歲災傷不敢別乞小郡然來年闕食之憂未知攸濟日俟罪譴而已李唐夫一宅甚安沉酣江山旬日忘歸非久赴任也

別後不一奉書懶慢之罪未有以解然別時亦先自陳矣比日履
茲初冬起居住佳勝切聞屢進拜喜抃無量與子功同侍邇英此最
縉紳之所榮慕又聞有旨許講罷奏事想日有補正也未緣會合
千萬自重

六

奉書不數愧仰可知辱手教且審起居佳勝爲慰某凡百粗遣聞
天官之除老病有加那復堪此卽當力辭乞閑郡爾側聆大用以
快羣望未間千萬以時自重不宣

七

忠文公碑固所願託附但平生本不爲此中間數公蓋不得已不欲卒負初心自出都後更不作不寫已辭數家矣如大觀其一也今不可復寫千萬亮察魯直日會且致區區兩辱書皆未荅直懶爾別無說然魯直不容我誰復能容我者

八

前日見報知新拜卽欲奉書爲賀又恐草草念行役間迫猝未能便如禮故不免發數字想不深訝不寐之喜豈獨以樂正好善之故耶更不必盡談公議所屬想公有以處之矣私意但望公不力

辭若又力辭乃似辭難矣餘亦見子由書中乍熱起居如何乍遠
千萬爲道自愛

九 赴定州

所示連日入問聖候極是極是見說執政逐日入問宗室亦逐日
問候也已將簡報錢尹令府中差人徧報諸公矣

十 惠州

某謫居瘴鄉惟盡絕欲念爲萬金之良藥公人知之不在多囑也
子由極安常燕坐胎息而已有一書附納長子邁自宜興挈兩房
來已到循州一行並安過近往迎之得耗旦夕到此某見獨守舍

耳次子迨在許下子由長子名遲者官滿來筠省覲亦不久到恐
要知六郎婦與二孫並安健過去日留一書并數品藥在此今附
何秀才去如聞公目疾尚未平幸勿過服涼藥暗室瞑坐數息藥
功何緣及此兩承惠錫器極荷意重丹霞觀張天師遺跡儻有良
藥異士乎令子不及別書侍奉外多慰子功之喪忽已除祥哀哉
奈何諸子想各已之官其孫婦甚長成旦夕到此矣

西下十一

惠州

丁丑二月十四日白鶴峰新居成自嘉祐寺遷入詠淵明時運詩
曰斯晨斯夕言息其廬似爲予發也長子邁與予別三年携諸孫

萬里遠至老朽憂患之餘不能無欣然乃次其韻我卜我居居匪
一朝龜不吾欺食此江郊廢井已塞喬木干霄昔我伊何誰其裔
苗下有澄潭可漱可濯江山千里供我遐矚木固無脛瓦豈有足
陶匠自至笑歌相樂我視此邦如洙如沂邦人勸我老我安歸自
我幽獨倚門或麾豈無親友雲散莫追旦朝丁丁誰欵我廬子孫
遠至笑語紛如剪鬢垂結覆此瓠壺三年一夢乃復見予予在都
下每謁范純夫子孫環遶投紙筆求作字每調之日詠旱乎詠滂
乎今皆在萬里欲復見此豈可得乎有來請純夫書因錄此數紙
寄之丁丑閏三月五日多難畏人此詩慎勿示人也

與范元長十三首 以下俱僖耳

某慰疏言不意凶變先公內翰遽捐館舍聞訃慟絕天之喪予一
至於生意盡矣伏惟至孝承務元長昆仲孝誠深至追慕罔極
何辜于天罹此禍酷荼毒如昨奄易寒暑哀毀日深奈何奈何某
謫籍所拘莫由往弔永望長號此懷難諭謹奉手疏上慰不次謹

疏

流離僵仆九死之餘又聞淳夫先公傾逝痛毒之深不可云諭久
欲奉疏不遇便人又舉動艱礙憂畏日深今茲書問亦未必達且

畧致區區耳

三

先公已矣惟望昆仲自立不墜門戶千萬留意其大者遠者勿徇
一至之哀致無益之毀與先公相照誰復如某者此非苟相勸勉
而已切深體此意餘不敢盡言

四

先公論往古事著述多矣想一一寶秘此豈復待鄙言耶某當遣
人致奠海外困苦不能如意又不敢作奠文想蒙哀恕也歸葬知
未得請苦痛之極惟千萬寬中順變此中百事遠不及宙然百憂

所集亦強自遣也

五

聖善郡君不敢拜慰疏言侍次乞致區區沉香少許望於內翰靈
几焚之表末友一慟之意而已

六

孫行者至得書承孝履如宜闔宅皆安感慰之極所論傳初不待
君言心許吾亡友久矣平生不作負心事未死不食言然今則
不可九死之餘憂畏百端想蒙矜察不卽副來意臨紙哀噎海外
粗聞新政有識感涕靈几儻遂北轅乎未間千萬節哀自重毒熱

揮汗奉疏不次

七

聖善郡君承起居佳適因侍次致下懇乞爲骨肉保愛寬懷以待
北歸也子進諸舅曾得安訊否

八

毒暑遠惟孝履如宜海外粗聞近事南來諸人恐有北轅之漸而
吾友翰林公獨隔幽顯言之痛裂忘生矧昆仲純篤之性感慟摧
割如何可言奈何奈何老朽一言非苟以相寬者先公清德絕識
高文博學非獨今世所無古人亦罕有能兼者豈世間混混生死

流轉之人哉其超然世表如仙佛之所言者必矣況其平生自有
以表見於無窮者豈必區區較量頃刻之壽否耶此理卓然唯昆
仲深自愛得歸亦勿亟遽俟秋稍涼而行爲佳某深欲一見左右
赴合浦不惜數舍之迂但再三思慮不敢爾必深察臨行預有書
相報熱甚萬萬節哀自重

九 以下俱北歸

到雷獲所留書承車從盤桓此邦以須一見而某滯留不時至遂
爾遠別且不獲一慟几筵之前者非愛數舍之勞也困危多畏故
爾此老謬之罪想矜察比日孝履如宜否方此炎暑萬里扶護哀

苦勞艱如何可言忝親友之末不能匍匐赴救已矣不復云也獨
前所見委文字不敢不留意今託少游議其詳錄惟節哀慎重某
不敢拜狀郡君惟千萬俯爲存沒寬心自重乞呈此紙令弟不殊
此意

十

某如聞有移黃之命若果爾當自梧至廣須惠州骨肉到同往計
公昆仲扶護舟行當過黃又恐公在淮南路行不出江西卽不過
黃又不知某能及公之前到黃乎漂零江海身非已有未知歸宿
之地其敢必會見之日耶惟昆仲金石廼心困而不折庶幾先公

之風沒而不亡也臨紙哽塞言不盡意

某書十二

過雷州奉書必達到容南知昆仲皆苦瘡痍又聞尋已痊損不知
卽日何如扶護哀痛且須勉強開解早心憂懸書不能盡奉囑之
意唯深察此心哀哉少游痛哉少游遂喪此傑耶賴昆仲之力不
甚狼狽某日夜前去十六七間可到梧若少留一見尤幸某到梧
當留以待惠州人至同泝賀江也速遣此人奉書不謹千萬恕察

不宣

某書十二

永州人來辱書承孝履粗造甚慰思仰比謂至梧州追及又將相
從泝賀江已而水乾無舟遂作番禺之行與公隔絕不得一拜先
公及少游之靈爲大恨也同貶先逝者十人聖政日新天下歸仁
惟逝者不可及如先公及少游真爲異代之寶也徒有僕輩何用
言之痛隕何及某卽度庾嶺欲徑歸許舍弟處必遂一見昆仲未
間惟萬萬強食自重

十三

某忽有玉局之除可爲歸田之漸矣痛哲人云亡誦殄瘁之章如
何可言早收拾事迹編次著撰相見日以見授也處度因會多方

勉之以不墜門戶爲急監司無與相知者及毛君亦不識未敢便
發書前路問人有可宛轉爲言者專在意也漂流江湖未能赴救
已爲慙負有銀五兩爲少游齋僧託送與處度也承中間郡君服
藥疾勢不輕且喜安復因侍次致懇千萬寬中保衛爲請不宣

與蘇子容二首

離黃州

某頓首違去左右已逾周歲矣懷仰之心惟日深劇比來伏計機
務多暇台候勝常向聞登擢常附啟事少致區區想獲聞徹未由
趨侍伏望爲國保重不宣

二 離黃州

某頓首廣陵令姪出所賜教勞問備至感戴無量兼聞比來台候
康勝以慰下情某欲徑往毗陵而河水未通留家儀真輕舟獨行
耳未卽伏謁門下豈勝馳仰乍熱伏冀爲道自重謹奉手啟不宣

與劉貢父七首

以下俱徐州

某啟久不奉書直是懶墮耳更無可藉口蒙問所以然但有愧悚
厚薄之說旣無有公榮之比亦不然老兄吾所畏者公榮何足道
哉人心真不可放縱閑散旣久毛髮許事便自不堪欲寫此書久
矣可笑可笑兄被命還史局甚慰物論然此事當專以相付乃爲
當耳示諭三宿戀戀情之常誰能免者然吏民之去公尤難耳何

日遂行惟萬萬以時自重謹奉啟

二

某啟向聞貢父離曹州遞中附問必已轉達即日不審起居何如
聞罷史局佐天府衆人爲公不平某以爲文字議論是非予奪難
與人合甚於世事南司解舍甚佳浮沉簿書間未必不佳也至於
進退毀譽固無足言者貢父聰明洞達況更練世故豈待言者耶
但區區之心不能不云爾某蒙庇無恙但秋來水患僅免爲魚而
明年之憂方未可測或教別乞郡脫去又恐遺患後人爲識者所
譏已附詔使奏牘乞以石甃城脚週迴一丈其役甚大且艱但成

則百餘年利也此去又須晝夜勞苦半年乃成後旬一宮觀漸
謀歸田耳窮蹇迂拙所值如此奈何奈何何時面言以散蘊結乍
寒惟萬萬自重不宣

三

某啟示及回文小闕律度精緻不失雍容欲和殆不可及已授歌
者矣王寺丞信有所得亦頗傳下至術有詩贈之寫呈爲一笑老
弟亦稍知此而子由尤爲留意淡於嗜好行之有常此其所得也
吾儕於此事不患不得其訣及得而不曉但患守之不堅而賊之
者未淨盡耳如何子由已赴南都十六日行矣

某啟近辱教并和王仲素詩讀之欣然有得也久不裁謝爲愧多矣向時令押綱人候信者附書信不審達否卽日起居住勝詩格愈竒古可令令子錄示數十首否僕蒙恩粗遣水退城全暫獲息肩然來歲之憂方未可量雖知議閉曹村口然不敢便恃其不來有一事須至干清聽去歲曾擘畫作石岸用錢二萬九千五百餘貫夫一萬五百餘人糧七千八百餘碩於十月內申詔使仍乞於十二月已前畫旨乃可幹辦雇募人匠計置物料正月初下手四五月間可了雖費用稍廣然可保萬全百年之利也今已涉春杳

未聞耗計日月已迫必難辦集又聞有旨下淮南京東起夫往漣

州其勢必無鄰郡人夫可以見及

前來本州下南京沂宿等州差人八千人并本州差夫三千五

百人共役一月可畢

以此知前來石岸文字必不遂矣今別相度裁減作木

岸工費僅減一半用夫六千七百餘人

仍差三千五百餘人以常平錢召募糧四千

三百餘碩錢一萬四千餘貫雖非經久必安之策然亦足以支持

歲月待河流之復道也若此策又不行則吾州之憂亦未可量矣

今寄奏檢一本奉呈告貢父與令姪仲馮力言之此事必在戶房

可以出力萬一不當手亦告仲馮力借一言此事決不可緩若更

下所屬相度往反取旨則無及矣況所乞止百餘紙祠部其餘本

州昔已有備若作而不當徐行遣官吏亦未晚惟便得指揮問片
初便呵下手爲佳某豈曉土功水利者乎職事所迫不得不爾每
自笑也若朝廷選得一徒吏善興利除害者見代一郡之幸也然
不敢自乞嫌於避事爾言輕不足以取信惟念此一城生聚必不
忍棄爲魚鼈也僕於朝中誰爲可訴者惟貢父相愛必能爲致力
仍乞爲調其可否詳錄付去人回不勝日夜之望未緣會面萬萬
以時自重人行奉啟不宣

此來五以下俱翰林

久濶暫聚復此違異悵惘至今公私紛紛有失馳問辱書感忤無

量字畫妍繁及問來使云尊貌比初下車時暫且澤矣聞之喜甚
比來起居想益佳何日歸覲慰士大夫之望未聞萬萬爲時自重
不宜

某忝冒過甚出於素獎

迂然

拙多忤而處爭地不敢作久安計兄當

有以教督之血指汗顏旁觀之誦奈何奈何舉官之事有司迷失
行之罪歸咎於兄清明在上豈可容此小子何與焉茯苓松脂雖
乏近効而歲計有餘未可棄也默坐反照瞑目數息當記別時語

耶

某江湖之人久留輦下如在樊籠豈復有佳思也人情責望百端而衰病不能應副動是罪戾故人知我想復見憐耶後會未可期臨書悵惘禪理氣術比來加進否世間關身事特有此耳願更着鞭區區之禱也

與曾子宣十三首

登州還朝

某啟流落江湖晚獲叨遇惟公照知如一日也孤愚寡與日親高誼謂得永久不謂尚煩藩翰之寄違濶以來思仰日深特辱書教伏承履茲初涼台候萬福欣慰之極二聖思治求人如不及公豈

久外惟千萬順時爲國自愛不宣

二 以下俱翰林

某啟日欲作塔記未嘗忘也而別後紛紛實無少暇既請寬限而自違之慙悚無地數日來方免得詳定役法自此庶有少閒得應命也屢煩誨諭知罪深矣

三

某啟上黨鴈門出一草藥名長松治大風氣味芳烈亦可作湯常服近歲河東人多以爲餉者不甚難致乞爲求一斤許仍恕造次

四

某再拜啟張倅損其父應之名谷者歐陽文忠公之友也文行清
修有古人風而仕不遂損亦守家法令子弟也與之久故幸得在
左右想蒙顧盼適有少冗而張倅行速不盡區區非久別奉狀不
宣

五

某啟涉暑疲病久闕上問曲蒙存錄遠賜手教感恟深至比日鎮
撫多暇起居清勝某託庇粗如直舍塊處游從稀少西望旌榮臨
書惘惘伏暑尚熾伏惟順序保練少慰下情不宣

六

某蒙庇如昨幸與子開同省孤拙當有依賴幸甚幸甚袞袞過日
無毫髮之補甚不自安又未敢乞郡何時款奉少盡所懷臨書惘
惘寄惠長松榛實天花菜皆珍異之品捧當感作

七

某啟辱教伏承台候萬福爲慰塔記非敢慢蓋供職數日職事如
麻歸卽爲詞頭所迫率常以半夜乃息五更復起實未有餘力乞
限一月所敢食言者有如河願公一笑而恕之且夕當卜一邂逅
而別

八

某啟昨日又辱寵顧感幸殊深仍審台候康勝爲慰塔記重承來
諭敢不稟命承借發願文幸得敬聞人還迫夜奉謝

九

某啟昨日辱台施臨顧不及拜迎方欲裁謝不敏遽枉手教感悚
無地且審比日起居住勝啟行有日終當卜一邂逅續馳問次人
還草草不宣

十

某再啟退辱示諭讀之汗流洽背非所以全莛不肖也塔記如河
之誓豈敢復渝惟深察之

十一

某深欲往會屬以約數相知在淨因矣不罪不罪後旬更不敢有
所如謹俟命耳來日必獲望見併留面謝悚息悚息

十二

某再啟自公之西有識日望詔還豈獨契愛之末邊落寧肅公豈
久外哉示諭塔記久不馳納愧悚之極乞少寬之秋涼下筆也親
家柳子良宣德赴潞幕獲在屬城知幸知幸謹奉手啟允迫不盡
區區

十三 南遷

某本不敢通問特承不鄙廢放手書存問乃敢裁謝萬一塔記久
草下因循未曾附上今不敢復寄異時萬一北歸或可錄呈爲一
笑也旦夕離南郡西望悵然言不能盡意

與劉仲馮六首

徐州

某啟早秋微涼伏惟機務多暇台候萬福高才盛德進貳西府有
識其慶豈惟區區契舊之末末緣伏謁門下但有馳仰伏冀順時
爲國保練不宣

二揚州

某拜違暮歲衰病疲曳書問不繼愧負深矣到揚數病在告出輒

困於迎送猶幸歲得半熟公私省力可以少安皆德庇所逮也

三 以下俱定州

某啟近奉賜教獎予過重感恠不已比日機務多暇台候勝常某
蒙庇如昨未緣接待但有馳仰乍暄伏冀爲國自重謹奉手啟不
宣

四

某再啟將官杜宗輔訥於言詞而治軍嚴整有足觀者趨闕參見
幸畧賜問當備驅使也

五

某啟近將官赴闕附狀不審已開覽否比日履茲薄著台候何似
某蒙庇粗遣民雖饑乏盜竊衰止若旦夕得一麥熟遂大稔矣未
緣瞻望伏冀爲國自重不宣

六

某近奏弓箭社事必已降下旦夕又當奏乞修軍營頻瀆朝聽悚
息待罪利害具狀中此不縷陳鄰近諸路皆時有北賊小小不申
報者尤多民甚患之惟武定一路絕無者以有弓箭社人故也近
承指揮開禁山事此正事本司舉察方欲從長酌中處置奏聞次
走馬者聞之遂以爲已見耳此弊所從來遠矣起稅爲永業者已

數百家若驟以法繩治起遣其人搔擾失業有足慮者自某到任
後斫伐開耕者四五火無不依法編管前此皆置而不問縱有本
縣寨解到亦平治小了耳其人開耕已成業者見別作孽盡旦夕
回申次

六

東坡集卷之四十八

尺牘

眉山蘇軾東坡氏著

與滕達道六十八首

杭倅

某啓近因使還奉狀必達比日想惟軒旆已達太原鎮撫之餘起
居住勝某此月出都今已達泗上淮山照眼漸聞吳歌楚語此樂
公當見羨也吳中有幹幸不外方暑千萬爲時自重

二 以下俱密州

某再啓東武今歲蝗災尤甚而官吏多方繩以微文蠲放絕少自
到任不住有人戶告訴既非檢覆之時已奏乞體量減放仍已申

聞去訖或更得明公一言尤幸也新法隊伍已團結次然有州縣
不得干預之說自古豈有郡守而不得管兵者其他不便未可以
一二數也咫尺無緣一見以盡所懷昨日得舍弟書王殿丞又恐
却赴任果爾則辟命又未可知也窮蹇圖事無適而不齟齬好笑
好笑

三

某啓新法將官所管兵更不差出而本州武衛差在巡檢者千餘
人若拙還則威勇忠果之類必填不足已申安撫司去訖爲論列
也

某啓違遠已久瞻仰日深卽辰履茲凝洵台候何如某孤拙無狀
得在麾下蓋天幸也但門庭咫尺無緣馳候豈勝悵然唯冀上爲
廟社益加自重謹奉啓上謝不宣

五

某再拜舍弟仰玷辟書荷恩至深不唯得所託附以爲光寵又兄
弟久別得少相近私喜殊深但未知可決得否渠朝中更無人可
與問逐明公憐之少爲留意當不難得也久違左右所懷千萬非
書所能盡也

六 以下俱徐州

某啓輒有少事奉白向在密州有都巡檢王述崇班者以踰濫體
量致仕不得廕子述乃慶曆名將王仲寶之孫咸之子咸爲鹽賊
李小三所殺述不肯發喪手擒此賊剗心祭其父乃肯成服僕具
以此奏其畧云忠孝臣子之大節踰濫武夫之小過捨小錄大先
王之政也先帝爲特官其子璋璋有武幹慷慨有父風而頗畏法
今聞其在公部內巡鹽料未有人知之願公呼來與語若果可采
望特與提拔剪拂異日必亦一快辣將官也想知道我之深不罪造

次

某啓示喻宜甫夢過於傳有無某聞見不廣何足取正然冷暖自知殆未可以前人之有無爲證也自聞此事而士大夫多異論意謂塗中必一見得叅扣更不果此意衆生纏繞愛賊故爲饑火所燒然其間自有燒不着處一念清淨便不復食亦理之常無足怪者方其不食不可強使食猶其方食不可強使不食也此間何必生異論乎願公以食不食爲日暮以仕不仕爲寒暑此外默而識之若以不食爲勝解則與異論者相去無幾矣偶蒙下問輒此奉啓而已不罪

某欲面見一言者蓋謂吾儕新法之初輒守偏見至有異同之論雖此心耿耿歸於憂國而所言差謬少有中理者今聖德日新衆化大成回視向之所執益覺疎矣若變志易守以求進取固所不敢若嘵嘵不已則憂患愈深公此行尚深示知非靜退意但以老病衰晚舊臣之心欲一望清光而已如此恐必獲一對公之至意無乃出於此乎輒恃深眷信筆直突千萬恕之死罪

九

安道公殆是一代異人示諭極慰喜慰喜

十以下俱黃州

某啓別來忽復中夏永日杜門思仰無窮比來起居何如張奉議
來稍獲聞問甚慰所望府第已成雄冠荆楚足使來者想見公之
風度無緣一寓目但有企想乍熱惟冀順時爲國自重因楊道士
行奉啓上問不宣

十一

某啓冗迫不時上狀伏想台候勝常某蒙庇如昨未還老哲輿論
缺然更冀爲國順時自重區區不宣

十二

某啓乍冷共惟台候萬福近因還使拜狀必達某蒙庇如昨廢放
雖久憂畏不衰見且杜門以全衰拙諸不煩垂念何時展奉臨紙
菀結尚冀以時自重少慰區區奉啓上問不宣

十三

某啓孟震亨之朝散與之黃州故人相得極懽今致仕在部下且
乞照管其人真君子也

十四

某啓專使辱示手書且審比日台候康勝甚慰下情某蒙庇如昨
但旬日來親客數人相過又李公擇在此不免往還紛紛裁謝少

稽諒未深訝未緣展奉惟冀順時爲國自重謹奉手啓上問不宣
某再啓蜀僧遂獲大字以歸不肖增重矣感恻之至蕭相樓詩固
見之子由又說樓之雄傑稱公之風烈記文固願掛名豈復以鄙
拙爲解但得罪以來未嘗敢作文字經藏記皆迦語想醞釀無由
故敢出之若此文當更俟年載間爲之如何仲殊氣訣必得其詳
許傳授莫大之賜也此道人久欲游廬山不知有行期末若蒙他
一見過又望外之喜也數年來覺衰不免回嚮此道矣不一

某恃舊眷輒復少懇本州倅孟承議震老成佳士有一子應武舉
未有舉主欲出門下輒納其家狀幸許其進特爲收錄孟倅以未
嘗拜見不敢便上狀其子頗有學行更乞詳酌累有干瀆悚息不
可言不一

十七

某啓孟生還領書教并賜大字二墨喜出望外從遊不厭而不得
公大字以爲闕典故輒見意始望數字耳豈敢覬許大卷乎張君
又有假虎之說每不敢當公若不嫌有何不可比日台候何如李
嬰長官乞告改葬過府欲求防護數人乞不阻乍暄萬乞爲國自

重冗中不宜

十八

某啓專人復來承已過信陽跋涉風雨從者勞矣比日起居何如
某比謂公有境上之約必由黃陂遂徑來此拙於籌量遂失一見
愧恨可知然所言者豈有他哉徒欲望見顏色以慰區區且欲勸
公屏黜浮幻厚自輔養而已想必深照此誠人還忽忽不宜

十九

某啓近專人還奉狀必達北日台候何如連月陰雨旅懷索寞望
德馳情如何可言尚冀保練以慰微願因孟生行少奉區區不宜

某啓知前事尚未已言既非實終當別白但目前紛紛衆所共嘆也然平生學道專以待外物之變非意之來正須理遣耳若緣此得暫休逸乃公之雅意也黃當路過往不絕語言人事人情難免不若稱病不見爲良計二年不知出此今始行之耳西事得其詳乎雖廢棄未忘爲國家慮也的信可示其畧否不能盡區區

某閑廢無所用心專治經書一二年間恐了得論語書易舍弟已了却春秋詩雖拙學然自謂頗正古今之誤粗有益於世暝目無

憾也又往往自笑不會取快活真是措大餘業聞令子手筆甚高
見其字想見其人超然者也

卷二十一

某啓專使至遠辱手誨累幅伏讀感慰所喜比來起居康勝不足
云也某凡百如常杜門謝客已旬日矣承見教益務閑藏而已近
得筠州舍弟書教以省事若能省之又省使終日無一語一事則
其中自有至樂殆不可名此法竒秘惟不肖與公其之不可廢也
畫本亦可摹爲省事故亦納去耳今却付來使不罪吳畫謾附去
冬至後齋居四十九日亦無所行運聊自反照而已願公深自愛

養區區難盡言想識此意也

某近張寔處蒙寄貺四壺今又拜賜數知不違條然屢為煩費已
不惶矣酒味極佳此間不可髣髴也

二十四

某啓所示文字輒以意裁減其冗別錄一本因公之成又稍加節
畧爾不知如何漕司根鞫摺據微瑣於公尤為便也緣此聖主皎
然知公無過矣非特不足卹乃可喜也但靜以待命如乞養疾之
類亦恐不宜荷異眷不敢不盡璋師羅漢堂記俟試思量仍作伽

語莫不妨名然廢人之文章未必喜之如何

二十五

某啓公忠義皎然天日共照又舊德重望舉動當爲世法不宜以小事紛然自辨若如來喻引罪而乞寬司僚於義甚善卑意如此

二十六

某到黃彼聞公初五日便發由信陽路赴闕然數日如有所失也欲便歸黃州又雨雪間作向僧房中明窻下擁數塊熟炭讀前漢書戾太子傳贊深愛之反復數過知班孟堅非庸人也方感歎中而公書適至意思豁然稍晴暖當陽羅江上放舟還黃也

某啓近日人還奉狀必達雪後寒苦伏想起居住勝歲復行盡展
奉何時旅懷索然但有傾系尚冀爲時自重別膺新社

某再拜見戒不爲外境所奪佩此至言何時忘乎王經臣者觀其
語論微似颺颺然其言未足全信也所傳小詞爲僞託者察之然
自此亦不可不密也回文比來甚竒嘗恨其主不稱若歸吾人真
可喜可謂得其所哉亦須出也元素若果來一段竒事當預以書
約之今攜俊生來一夔足矣冗迫久不上狀伏想台候勝常某蒙

庇如昨未還老哲輿望缺然更冀順時爲國自重

某啓二十九

某啓示喻夏中微恙卽日想全清快近聞元素開閤放出四人此
最衛生之妙策其一姓郭者見在野夫處元素欲醒而野夫方醉
爾頒示一小團皆新奇蘇合酒亦佳絕每蒙輟惠慙感可量今日
見報蒲傳正般出天壽院何耶張夢得嘗見之佳士佳士

三十

屢枉專使感愧無量兼審比來尊體勝常以慰下情某近絕佳徒
見教如元素黜罷薄有所悟遂絕此事仍不復念方知此中有無

身城集卷四
量樂回顧未絕乃無量苦辱公厚念故盡以奉聞也晚景若不打
登此事則大錯雖二十四州鐵打不就矣既欲發一笑且欲少補
左右耳不罪不罪

三十一

公解印入覲當過岐亭故縣預以書見約輕騎走見極不難慎勿
枉道見過想深識此意乍冷萬乞自重

三十一

以下俱
離黃州

某啓僕買田陽羨當告聖主哀怜餘生許於此安置幸而許者遂
築室荆溪之上而老矣僕當閉戶不出君當扁舟過我醉甚書不

成字

三十三

某晚生蒙公不鄙與游又令出字似涉僭易願公自命却示及作字說乃寵幸也

三十四

某再拜承示喻盛字見耘老云改作達道不知尚未定耶欲令重議此朋友之事某於公為晚輩豈敢當此然公有命不敢違當徐思之先以書布聞左右然後敢作說也惶恐惶恐

三十五

東坡集卷四十八尺牘

某啓久不奉狀愧仰日深辱專人手書具審比來台候勝常感慰
兼集自聞公得吳興日望一見於中塗而所至以賤累不安遲留
就醫竟失一嬰兒又老境所迫歸計茫然故所至求田問舍然卒
無成十四日決當離此真州更不敢住恐真守堅留當任一日不
知公猶能少留以須一見否死罪死罪若到揚聞公猶在亦須當
輕舟往見也若又失此期則遂遠別矣漸涼惟順時爲國自重人
還謹奉狀布謝不宣

三十六

某去歲所買田已旱損一半更十日不雨則已矣竒窮所向如此

可笑可笑老遠去此意豈可忘老病憔悴得公厚顧翹然增氣也

三十七

某啓疊蒙遣人賜書憂愛厚甚感怍不已比日履茲新涼台候勝常深慰下情喪子之戚尋已忘之矣此身如電泡況其餘乎聞今日渡江恨不飛去風逆不敢渡又與一人期於真州有少急切之幹度非十九日不可離真早發莫可見公以二十日行猶可趨上官日也不知能少留否若得畧見喜幸不可言也餘冀爲時自重

三十八

某到此時見荆公甚喜時誦詩說佛也公莫畧往一見和甫否餘
非面莫能盡某近到筠見子由他亦得旨指射近地差遣想今已
得替矣吳興風物足慰雅懷郡人有賈收耘老者有行義極能詩
公擇子厚皆禮異之某尤與之熟願公時一顧慰其牢落也近過
文肅公樓徘徊懷想風度不能去某至楚泗間欲入一文字乞於
常州住若幸得請則扁舟謁公有期矣

三十九

某啓別後不意遽聞國故哀號追慕迄今未已惟公忠孝體國受
恩尤異悲苦之懷必萬常人比日起居何如某旦夕過江徑往毗

設相去益近時得上問也爲時自重不宜

四十

某再啓承差人送到定國書所報未必是實也都下喜妄傳事而此君又不審乃四月十七日發來邸報至今不說是可疑也一夫進退何足道所喜保馬戶導洛堆堦皆罷茶鹽之類亦有的耗矣二聖之德日新可賀可賀令子各安勝未及報狀也

四十一

某啓耜老至又辱手書及耜老道起居之詳感慰不可言某留家儀真獨來常以河未通致公見思之深又有舊約便當往見而家

無壯子第須却還般挈定居後一日可到也惟深察近日京口時
有差除或云當時亦未是實計當先起老鎬僕或得連茹耶惠賜
三十壺携歸餉婦矣餘耘老能道不宣某頓首

四十二

聞張郎已授得發勾春中赴上安道必與之俱來某若得旨當與
之聯舟而南窮困之中一段樂事古今罕有也不知遂此意否泰
太虛言公有意拆却逍遙堂橫廊切謂宜且留之想未必爾聊且
言之明年見公當館於此公雅度宏偉欲其軒豁卑意又欲其窈
窕深密也如何不罪造次

四十三

四聲可罷之萬一浮沉反爲患也幸深思之不罪

四十四

某再啓近在楊州入一文字乞常州住如向所面議若未有報至南都再當一削也承郡事頗繁齊整想亦期月之勞爾微疾雖無大患然願公無忽之常作猛獸毒藥血益膿囊觀乃可勿孤吾黨之望而快羣小之志也情切言盡必恕其拙幸甚

四十五

某啓一別四年流離契濶不謂復得見公執手恍然不覺涕下風

俗日惡忠義寂寥見公使人差增氣也別來情懷不佳忽得來教甚解鬱鬱且審起居佳勝爲慰某以少事更數日方北去宜興川已問去若得稍佳者當扁舟徑往視之遂一至湖見公固所願然事有可慮者恐未能往也若得請居常則固當至治下攪擾公數月也未間惟萬萬爲時自重

四十六

某再啓別論具感知愛之深一一佩刻董田已遣人去問宜興親情若果爾當乘舟徑往成之然公欲某到吳興則恐難爲不欲盡談唯深察之到南都欲一狀申禮曹凡刊行文字皆先毀板如所

教也有監酒高侍禁永康者與之外姻聞亦甚謹幹望畧照庇如
察其可以剪拂又幸也

四十七

以下俱
赴登州

某啓前蒙惠建茗甚荷醉中裁謝不及愧悚之劇登州見闕不敢
久住遠接人到便行會合邈未有期不免悵惘舍弟召命蓋虛傳
耳君實恩禮旣異責望又重不易不易某舊有獨樂園詩云兒童
誦君實走卒稱司馬持此將安歸造物不我捨今日類詩識矣見
報中憲言右揆不當見在告必知之京東有幹幸示喻

四十八

某啓專使至辱手誨伏承起居佳勝大慰馳仰某受命已一月甚
欲速去而遠接人未至船亦未足督之矣向雖有十日之約勢不
可住愧負無限區區之學頃亦試之矣竟無絲毫之補復此強顏
歸於無成徒爲紛紛益可愧也心之伊鬱非面莫能道想識此意
唯萬萬爲人自重人還奉啓上謝不宜

四十九

某啓承專人借示李成十幅圖遂得縱觀幸甚幸甚且暫借留令
李明者用公所教法試摹看只恐多累筆耳此本真竒絕須當愛
護也月十日後當於徐守處借人贖納

五十

其啓前者便還醉中裁謝極於散慢至今恐愧不審比日台候何
似某已被命實獎借之素已奏候遠接人計不過七月中下旬行
伏恐知之士論望公入覲久未聞何也想亦不遠無由別瞻望
惋悵溽暑方熾萬異順時爲國自重不宣

五十一

許爲置朱紅累子不知曾令作否若得之攜以北行幸甚如不及
已亦非急務不罪

五十二 以下俱
登州

某啓入春來連日雨今日忽晴快所居江山爽秀悵然懷公不知
頗作樂否近得安道及張郎書甚安健子由想已過矣青州資深
相見極懽今日赴其盛會也閑恐要知

五十三

某再拜自承哀疚日欲拜疏以不審知從者所至以故至今日月
如昨忽復徂暑伏惟追慕摧切觸物增慟奈何奈何即日伏料孝
履支福明公聲望隱然雖未柄用坐鎮一方猶足以携持人心今
茲退歸有識所共嘆而孤拙無狀尤爲失巨庇也唯異節哀自事
少慰區區謹奉手啓上問不次

五十四

某啓少懇布聞不罪不罪某好携具野飲欲問公求朱紅累子兩
卓二十四隔者極爲左右費然遂成藉草之興爲賜亦不淺也有
便望頒示悚息

五十五

某本作此書託一同人帶去旣而其人却留滯淮南近復帶還豈
勝慚悚今復附上前疏貴察其非懈怠也忽然秋盡起居何似向
承示喻斤斧鄙詞非見愛之深豈能爾耶向示自有一本云且關
尊前見在身恐閑知之東方有幹乞示下

五十六

某于武累子已蒙佳惠又爲別造朱紅尤爲竒妙物意兩重何以
克當捧領訖感愧無量舊者昨寄在常州令子由帶入京俟到不
日便持上也

五十七

鱖魚三百枚黑金棋子一副天麻煎一節聊爲土物不罪浼觸令
子思渴冗中不及別啟

五十八

某感時氣臥疾逾月今已全安但幼累更臥尚紛紛也措道人名

世昌縣竹人多藝然可閑攷驗亦足以遣懣也留此幾年與之
稍熟悉要知

五十九

所有二賦稍晴寫得寄上次只有近寄潘谷求墨一詩錄呈可以
發笑也衲衣尋得不用更尋累卓感留意悚怍之甚甘子已拜賜
矣北方有幹垂示

六十一

某屏居如昨舍弟子由得安問此外不煩遠念久不朝覲緣此得
望見清光想足慰公至意其他無足云者貴眷令子各計安勝月

中前急足遠寄必已收得畧示諭

六十一 登州還朝

某啓此去見有方藥可以起公之微疾者專爲訪之如所諭也四月中所報及却罷之由未聞其實到都下當馳白也

六十二

以下俱南省

某慰言不意禍故奄及閨閣聞問怛然悲惋不已竊惟恩義之重哀痛難堪日月如昨屢易弦望追慟無及觸物增感奈何奈何未由躬詣吊問臨紙哽塞謹奉疏陳慰謹疏

六十三

某啓驚聞郡封傾逝悲愴無量恨不躬往慰問但以至理寬譬左右也平日學道熟觀真妄正爲今日但當審察本心無爲客塵幻垢所污況公望重中外今者人物雕喪耆老殆盡切須自愛若使纏綿留戀不卽一刀兩段乃是世俗常態非所望於傑人也願三復此語而已餘非面能盡

六十四

某以館伴北使半月比出方聞公有闈中之戚慰問後時本欲別作命子昆仲慰疏秦君行速作書未及惟千萬節哀以慰親意也相次別奉狀

六十五 以下俱
翰林

某啓迫冗稍疎上問愧仰增極切想下車以來靜治多暇有以自
適卽日履茲酷暑台候何似某忝冒過分非提獎有素何以及此
明公舊德偉望尚在外服輿論未允伏冀以時倍加保養以慰區
區不宣

六十六

某啓近數奉狀一一聞達比日切惟鎮蒞多暇台候萬福某蒙庇
粗遣但躡次驟進處必爭之地非久安計但脫去無由公必念之
蒙惠地黃煎扶衰之要藥若續寄尤幸

六十七

某再啓瀛州之命旣以先諱爲辭想當易地耶所云杭已除元素計必聞之矣佳夢豈特公愛我之深發於想念爾批示黨人甚堪一笑而已子由除戶侍方欲辭免也閑恐知之孔經甫外制顧將軍夕拜張仲舉待制皆恐要知廣大格豈敢望李愬子耶然亦有一長從來不敢使倖及賴耳想當一笑寄惠地黃煎感服厚念

六十八

某啓部民董遷篤學能文下筆不凡非復世俗氣韻如請見願加獎勵遂成就之其兄復溱學道屏居不與俗交其文亦秀邁可觀

皆公所欲知者故敢以聞近因親情王承議行託附書信必達某
衰病短才任用過量論議疎闊所向難合日俟汰遣而已辱知之
厚故粗及之

與李公擇十七首

杭州

某已過滿蘇明之來近聞明之已除臺直果爾替期未可決也書
上主人如不厭客當去叨聒聞已舉姚掾非老兄風義誰肯舉此
孤寒木訥之士也哉聞往來者奉談不容口足爲交游之慶墨妙
堂記并詩各告求數本同時幸老屢寄然皆墨淡不光告令指揮
如法打道場何山時復一游否某雖未得卽替然更得於西湖過

一秋亦自是好事景色如此去將安往但有著衣喫飯處得住且住也但恨舍弟相遠然亦頗得信亦甚好恐要知

二離杭倅

某頓首某忝命皆出推借知幸知幸始者深欲一到吳興緣舍弟在濟南須一往見之然後赴任濟南路由清河而冬深卽當凍合須急去乃可行遂不得一去別所懷千萬非書所能盡也

三

某再拜孝叔丈向有徑山之約今已不遂無緣一別且乞致意陳令舉有書來云相次去奉謁相聚必款東萊所乏茶與柑橙而君

地生焉可各致少許爲贐若要瓜壘到任後當寄獻呵呵李君行
時不及奉書兼醉後揮抹殊鮮禮悚

四 赴密州

某已到揚州此行天幸旣得李端叔與老兄又途中與完夫正仲
巨源相會所至輒作數劇飲笑樂人生如此有幾未知他日能復
繼此否乍爾睽違臨紙於邑

五 以下俱
徐州

某頓首久不得來誨亦稍憂懸料公必不暇爾近領手教果爾劫
劫殊不及爲郡之樂比日起居住勝否貴眷各無恙且喜九郎壯

健勝往日深可慶某輒有一孫體甚碩重決可以扶犁荷鋤想公亦爲我喜也八月十二日生名楚老六郎不見應舉得失如何邁往南京爲舍弟此月十一日嫁一女與文與可子呼去幹事憲局尋常少事何爲乃爾紛紛想不常如此也

六

某再拜舍弟得信無恙但因議公事爲一倅所怒日夜欲傾之念脫去未能爾子由拙直之性想深知之非公孰能見容者然實無他爾而人或不亮牢落如此爲一農夫而不可得豈復有意與人爭乎亦不足言聊可一笑而已

七

子由近爲棲賢僧作僧堂記讀之凜然覺崩崖飛瀑逼人寒冽也

八 以下俱
黃州

某啓春夏多苦瘡癩赤目因此杜門省事而傳者遂云病甚者至云已死實無甚恙今已頗健然猶欲謝客恐傳者復云云以爲公憂故詳之鄭公雖已逾八旬然耆舊彫喪想當爲國悽愴公擇萃老進用皆可喜然亦彙征之漸殆恐未爾知首料臺閣殊不聞果爾甚可喜元素若能力止其行極佳亦當走書道此也所要新詩實無一字小詞墨竹之類皆不復措思惟於飽食甘寢中得少三

昧一笑一笑文編一閱灑然自失濯喧埃而起衰思也

九

某再拜諭養生之法雖壯年好訪問此術更何所得然比年流落瘴地苦無他疾似亦得其力爾大約安心調氣節食少欲思過半矣餘不足言某見在東坡作陂種稻勞苦之中亦自有樂事有屋五間果菜十數畦桑百餘本身耕妻蠶聊以卒歲也

十

某頃首知治行窘用不易僕行年五十始知作活大要是慳爾而文以美名謂之儉素然吾儕爲之則不類俗人真可謂淡而有味

者又詩云不戢不難受福不那口體之欲何窮之有每加節儉亦是惜福延壽之道似此鄙俗且出於不得已然自謂長策不敢獨用故獻之左右住京尤宜此策也一笑一笑

十一

某啓示及新詩皆有遠別惘然之意雖兄之愛我厚然僕本以鐵心石腸待公何乃爾耶吾儕雖老且窮而道理貫心肝忠義填骨髓直須談笑於死生之際若見僕困窮便相於邑則與不學道者大不相遠矣兄造道深中心不爾出于相好之篤而已然朋友之義專務規諫輒以狂言廣兄之意爾兄雖懷坎壈於時遇事有可

尊主澤民者便忘軀爲之禍福得喪付與造物非兄僕豈發此看
訖便火之不知者以爲詭病也

十二

某啓近領手教極慰想念比日起居何如秋色佳哉想有以爲樂
人生唯寒食重九慎不可虛擲四時之美無如此節者矣寄示妙
藥刀鞘並已領近有潮州人寄一物其上云扶劣膏不言所用狀
如羊脂而頗堅盛竹筒中公識此物否味其名必佳物也若識之
當詳以示可分去或爲問習南海物者料公亦不久有別命如未
冬間又得一見孤旅之幸乍冷萬萬自攝

十三

某啓杜門謝客甚安適氣術又近得其簡妙者早來此向傳不可
獨不死也子由無恙十月喪其小女二歲矣屢有此戚固難爲情
須能自解爾所諭曹光州親情與卑意會已作書問子由次第必
成也鳧臍納少許去然終未知其實不知所諭果然否猶賴不會
經服食也效劉十五體作回文菩薩蠻四首寄去爲一笑不知公
曾見劉十五詞否劉造此樣見寄今失之矣得渠消息否華老必
時得書在徐樂乎

十四

某啓某獲來教佩戴至意比日起居住勝雪屢作足慰勸耕之懷
昨日船到送惠木奴人甕筭已作三百疋絹看矣新歲不及奉觴
唯祝晚途遇合使退耕窮士與民物並受其賜也寒苦萬萬自重

十五

與可之亡不惟痛其令德不壽又哀其極貧後事索然而子由媚
其少子頗有及我之累所幸其子賢而文久遠却不復憂唯目下
不可不助他爾

聖朝十六
以下俱
北還

某啓逆風數日爲左右滯留而孤旅蒙幸多矣但以多別得一見

風度亦不復以別去爲戚也比日伏惟起居佳勝小舟阻風浪聲
室此依又費照遣矣古鐵納上餘萬萬善愛不宣

十七

某啓兩日連見忽忽竟何言暄和起居何如夷中送王徐州詩有
見及語方是時人以相識爲諱欲一見面道此爲笑竟不見可太
息也適所白是宗人檄雅州幕不一

與錢穆父二十八首

南首

某啓久以使客紛紛不奉書愧仰不可言辱手教且審台候勝常
愛子襁負天喪想深痛割惟深照浮幻一洗無益之悲至望至望

二 以下俱
翰林

某啓前日辱書及次公到頗聞動止之詳慰浣無量微疾想由不
忌口所致果爾幸深戒之某亦病寒嗽逾月不除衰老有疾難愈
豈復如昔時耶承和揉菊詞次公處幸見之未由會合千萬順候
自重忽忽奉啓

三

某啓辱書伏承比來尊體安佳甚慰所望毒暑不可過使客紛紛
然殆不能堪數日以熱毒發瘡數處且告謁休養以備坤成終日
之勞也奉羨清閒獨無此福惠茶既豐且精除寄與子由外不敢

妄以飲客如來教也然細思之子由既作臺官亦不合與喫薛能
謂所賴有詩情爾呵呵公久外召還當在旦夕掃榻奉候矣不宣

四

某啓長至祝頌之意則深矣不敢上狀懼煩回荅辱手簡甚荷知
照比日起居住佳勝河間之命料必難辭日企來音少慰久闊未聞
萬乞爲國自重不宣

五

某近得家報王郎子立暴卒於奉符爲之數日悲慟在告亦緣此
也此君受知於公想亦爲之悽惋子由遠使歸來聞之煩惱可知

子立只一女子竟無兒可傷可傷冗中來使告廻不一

六

某啓兩日台候何如知藥力已行必遂輕安飲食不減否何日可
出告令郎寫一二字示下不宣

七

某啓辱示雄篇古人所謂味無窮而炙逾出者不肖何敢庶幾乎
然三五日間當試和謝也入夜布啓草畧不宣

八
以下俱
杭州

某啓多日不上問辱書感慰之至比日起居益佳微疾已痊復新

詩妙曲得於敲榜間欣承加惠也輒復一篇惟不示人爲望雅奏
已行遣因毀所集也知之冬來全少事時復開樽湖上但少佳客
爾未由會集千萬以時保衛不宣

九

承錄示元之詩舊雖曾見之今得公親書甚喜令跋尾詩詞如此
豈敢挂名其間呵呵惠示江瑤極鮮庶得大嚼甚快北方書問幾
絕況有苞苴見及乎昨日忽得兩壺謹分其一不罪微澆某再拜

十

令子不及奉書昨日與楊次公書有少事託面白必達春夏之交

米價必大長可畏公必有以待之幸預以教我數郡閉糴大爲杭
病江東尤爲害也屢移不報錄得其榜已削去依條災傷免力勝
民甚悅恐知杭酥不佳已督之矣

十一

今日得憲檄亦以閩盜恐軼至衢陸爲戒度亦未遽爾也惟浙西
數郡水潦旣甚而七月二十一二三三日大雨暴風幾至掃盡災
傷旣不減去歲而常平之備已空此憂在僕與中玉事有當面議
不可以尺書盡者屢以此意招之絕不蒙留意云冬初方過浙西
雖子功日夕到然此大事得聚議乃濟數舍之勞譬如來一看潮

亦自佳事試告公以此意勸之勿云僕言也如何如何吾儕作事十分周備僅可免過小有不至議者應不見置也米分稍平更一月必貴日夜望中玉來放脚手糴得十餘萬石相次漕司爭糴軍糧及上供必大翔湧其他合行遣事未易一一遽言願公因會度可言卽言之幸甚幸甚此事某已兩削矣諸公雖未必喜然度無不行下之理

十二

某蒙令子寄示五賦幸甚且爲矩範也後舉又預高等矣近本州舉子數百人來陳狀以習賦者多乞發解各立分數已爲削去矣

閑知之小兒差遣蒙留意以遞中間之矣非久得報卽馳白也悚
息悚息

十三

過拙而愿旣備門下人又日夕左右想蒙提誨如子姪不在區區
干禱也乍到穎不能無少冗速遣此人未能盡意令子相見都下
不款曲計今已赴任矣

十四

新刻特蒙頒惠不勝珍感竹萌亦佳貺取筍簞菘心與鱖相對清
水煮熟用薑蘆服自然汁及酒三物等入少鹽漸漸點灑之過熟

可食不敢獨味此請依法作與老嫂其之呵呵

十五 潁州

蒙仲過此以急欲省覲不敢攀留甚愧聞試得甚佳且夕馳賀也
兩小兒本令閑看場屋今日榜出皆捷新學妨占解名可愧也

十六 揚州

某啓示諭罷使裁減事既不出船何用借買許多什物已令本州
一一依倣裁定矣幸甚幸甚條式指定事卽未敢擅減知之稍暇
別奉狀不罪

十七 以下俱揚州還朝

某啓置犀伏螭之句所不到也欽羨欽羨

十八

某啓多日不接奉思企之深伏計台候日就康復欲往見恐倦
客乞此示數字炷艾必得力也新詩想多有不一

十九

子功數日不相見省中殊岑寂也公何日可出乎

二十

某近蒙回教令記新齋恐必不堪用然亦當試抒思也會于告豐
令郭緹支使孟易一京削恐新年求者必多畧乞記錄令子必已

到溫秀老成真遠器也冗迫不盡區區

二十一

某啓多日不接奉思企不可言辱教字承起居佳勝浴會不得暇
赴葢除夜有婚會兩日紛紛也嘉篇幸蒙錄示愁人淚眼之句讀
之惘然公達者何用久爾戚戚嘉節且一笑爲樂區區之祝也

二十二

某啓前日辱簡以妻孥皆病不卽荅悚息陰雨起居何似寄
穎叔詩和得納去與公咫尺胡越何論穎叔也可歎可歎其一章
未允方再上也不一一

二十三

某啓伏承蒞事之初雖稍勞神而吏民欣悚實爲盛事無由請賀
但有企渴辱簡且審起居佳勝餘俟八日廷中可談

二十四

某啓辱示承起居佳勝熙帥鄙意亦欲餞之公用二日卽當趨赴
元日殿門外更議之也惠貺山芋柑棗感刻之至忽忽布謝不謹

二十五

某啓伏暑伏想起居康勝老婦病稍加某亦自傷暑殊無聊遂且
謁告免詞事也一詩謾呈謂掃庭訟響夏口詩筒亦數年來故事也

呵呵草不謹

某啓知盛會早散能過家庖煮菜夜話否忽忽不罪

二十七

某啓辱承起居佳勝所約敢不如教絕早到門惟少設食了兩碑也醪餞用二十四謹諾

二十八 赴定州

某啓昨日遠勤從者草草就別慨悵不已使至又辱手誨仍以高篇寵行讀之增恨愴也欲和荅人客如織當俟前路惠茶已戒兒

曹別藏之矣非良辰佳客不輕啜也令子昆仲特煩遠至感恠不
已所欲言非可以筆墨旣想已目擊自餘惟若時自愛而已不宣

與李伯時

辱手示及惠新醞感愧殊深卽日起居佳勝洗玉池銘更寫得小
字一本比之大字者稍精請用陳伯修之說更刻於石柱上爲佳
人還奉謝

與郭功父七首

以下俱
杭倅

昨日承顧訪殊慰久濶經夕起居佳否某出院本欲徃見以下蒞
乏力未果想未訝也畧奉啓布謝萬一

久別忽得瞻奉喜慰可量既以不出又數日臥病遂阻言笑愧悚
不可言稍涼起居佳否某下痢雖止尙羸爾也謹奉啓布謝

三

兒子歸來別無可爲土物御筆一雙賜墨一圭新茶兩餅皆得之
大臣家真物也不罪浼瀆

四

辱訪臨感忤獨以忽遽爲恨迫行不往謝惟寬恕乍熱萬萬自重
不宣

五

別來瞻仰無窮風雪凝寒從者勤矣辱書承起居甚佳爲使者即
至必且暫還惟萬萬自重

六 以下北歸

昨辱寵臨久不聞語殊出意表蓋所謂得未曾有也經宿起居住
勝閒居致厚饌拜賜慙感只今上謁次一肉足矣幸不置酒

七

某今日私忌未敢上謁辱詩和呈爲一笑青皮一片不以餉公則
無與嘗者矣

與文與可三首

以下俱徐州

與可抱才不試道道彌久尚未聞大用公議不厭計當在卽然廊廟間誰爲卹公議者乎老兄旣不計較但乍失爲郡之樂而有桂玉之困又却不見使者嘴向得失相乘除亦畧相當也彭門無事甚可樂但未知今夏得免水患否子由頻得書甚安示論秋冬過親甚幸甚幸令嗣昆仲各計安勝爲學想皆成就矣

二

離浙中已四年向亦有少浙物久已分散零落矣有藥玉船兩隻獻上恰好吻酌不通客矣呵呵杭州故人頗多致之不難當續營

之但恐得後不肯將盛作見借也

三

近屢於相識處見與可近作墨竹惟劣第只得一竿未說字說潤
筆只到處作記作贊備員火下亦合剩得幾紙專令此人去請幸
毋久秘不爾不惟到處亂畫題云與可筆亦當執所惠絕句過狀
索二百五十疋也呵呵

與文郎

黃州

不審荼毒以來氣力何似變故如昨兩易晦朔追慕無窮奈何奈
何中前人還辱書重增哽咽吾親孝誠深篤若不少節哀摧惟意

所及不以後事為念何以仰慰堂上之心惟萬萬寬中強食

不省茶肆以來餘代可也

與文順

宗三百五十五

其人遠不爾不謝



一筆未結

...

東坡集卷之四十九

尺牘

眉山蘇軾東坡氏著

與王定國四十一首

以下俱黃州

某啓自到黃州卽屬岸人日伺舟馭消耗忽領手教頃解憂懸仍
審比者體氣清強且能自適至慰知未決東西計其迂直驗易相
去必不懸絕而得一見乃是不肖大幸不識果安從某寓一僧舍
隨僧蔬食甚自幸也感恩念咎之外灰心杜口不曾看謁人所云
出入蓋往村寺沐浴及尋溪傍谷釣魚採藥聊以自娛耳

某啓

某啓罪大責輕得此甚幸未嘗戚戚但知識數十人緣我得罪而定國爲某所累尤深流落荒服親愛隔闕每念至此覺心肺間便有湯火芒刺今得來教旣不見棄絕而能以道自遣無絲髮帶介然後知定國爲可人而不肖他日猶得以衰顏白髮廁賓客之末也甚幸甚幸恐從者不由此過故專遣人致區區惟願定國深自愛重仍以戒我者自戒而已臨書悒悒不知此人到江猶及見仙舟否忽忽不宣

三

某啓揚州有侍其太保者官於瘴地十餘年北歸面色紅潤無一

點瘴氣只是用摩脚心法耳此法定國自巳行之更請加工不廢
每日飲少酒調節飲食常令胃氣壯健安道軟朱砂膏某在湖州
服數兩甚覺有益到彼可久服子由昨來陳相別面色殊清潤目
光炯然夜中行氣臍腹間隆隆如雷聲其所行持亦吾輩所常論
者但此君有志節能力行耳粉白黛綠者俱是火宅中狐狸射干
之流願深以道眼看破此外又有一事須少儉嗇勿輕用錢物一
是遠地恐萬一闕乏不繼二是災難中節用自貶亦消厄致福之
一端所懷千萬書不能盡一二也

某啓賓州必薄有瘴氣非有道者處之安能心體泰健以俟否亨
耶定國必不以流落爲戚戚僕不復憂此但恐風情不節或能使
腠理虛怯以感外邪此語甚愬而情到願君深思先構付屬之重
痛自愛身膏氣舊旣勤於道引服食今宜倍加功不知有的便可
留桂府否

五

某啓君本無罪爲僕所累爾想非久必漸移善地也僕甚頑健居
處食物皆不惡但平生不營生計賤累卽至何所仰給須至遠迹
顏淵原憲以度餘生命分如此亦何復憂慮在彭城作黃樓今得

黃州欲換武遂作團練皆先議因來書及之又得一笑也子出不
住得書必已出大江食口如林五女未嫁比僕又是不易人也奈
何奈何蕙京法二壺感愧之至欲求土物爲信僕旣索然而黃又
匱甚竟無可持去好笑好笑兒子邁亦在此不敢令拜狀恐煩瀆
也承新詩甚多無緣得見耿耿僕不復得此時復看詩而已

六

某作書了欲遣人至江州李奉職言定國必已從江西行必不及
矣故復寫此紙遞中發去聞得此中次第人皆言西江漸近上水
石湍激險惡不可名大不如衡潭之善安然業已至彼不可復回

也若於臨江軍出陸乃長策也貴眷不多不可謂山溪之險而避
陸行之勞也衆議如此切請子細問人毋以不賞之軀輕犯憂患
也前書所憂惟恐定國不能愛身嗇色願常置此書於座右如君美
材多文忠孝天稟但得不死必有用於時雖賢者明了不待鄙言
但目前日見可欲而不動心大是難事又尋常人失意無聊中多
以聲色自遣定國竒特之人勿襲此態相知之深不覺言語直突
恐欲知他日不訝也

七

某受張公知遇至深罪廢累辱其門下獨不復擯絕否如何如何

想時得安問貴眷在彼必安

八

某再拜遞中領手教知已到官無恙自處泰然頓解憂懸又知攝
二千石風采震於殊俗一段奇事也某羈寓粗遣但八月中喪一
老乳母子由到筠亦拋却一女子年十二矣悼念未衰復聞堂兄
中舍卒於成都異鄉罹此觸物悽感奈何奈何近頗知養生亦自
覺薄有所得見者皆言道貌與往日殊別更相闊數年索我閩風之
上矣兼畫得寒林墨竹已入神品行草尤工只是詩筆殊退也不
知何故張公比得書無恙但以厚之去婦家事無人幹頗牢落子

山在筠甚苦局事煩碎深羨老兄之安逸也非久冬至已借得天
慶觀道堂三間燕坐其中謝客四十九日雖不能如張公之不語
然亦常闔戶反視想當有深益處定國所寄臨江軍書久已收得
二書反覆議論及處憂患者甚詳旣以解憂又以洗我昏蒙所得
不少也然所謂非苟知之亦允蹈之者願公嘗誦此語也杜子美
在困窮之中一飲一食未嘗忘君詩人以來一人而已今見定國
每有書皆有感恩念咎之語甚得詩人之本意僕雖不肖亦嘗庶
幾髣髴於此也文字與詩皆不復作近爲塋老乳母作一誌文公
又求某書輒書此奉寄今日馬鋪李孝基送君謨石刻一卷求其

後有定國題字又動我相思之懷作惡久之數日前發勾沈達過
此亦云與定國熟船中會話半夜強半是說定國近有人惠丹砂
少許光彩甚奇固不敢服然其人教以養火觀其變化聊以怡神
遣日賓去桂不甚遠朱砂若易致或爲致數兩因寄示稍難卽罷
非急用也窮荒之中恐亦有一二奇士當以冷眼陰求之大抵道
士非金丹不能解化而丹材多出南荒故葛稚川乞岫屨令竟化
於廉州不可不留意也陳璞一月前直往筠州看子由亦粗傳要
妙云非久當來此人不惟有道術其與人有情義久要不忘如此
亦自可重道術多方難得其要然以某觀之惟能靜心閉目以漸

習之但閑得百十息爲益甚大尋常靜夜以脉候得百二三十至
迺是百二三十息爾數爲之似覺有功幸信此語使真氣雲行體
中瘡冷安能近人也知有煞賣鴟鴞甚便此間無有但買斫鱸魚
及猪羊麀鴈亦足矣廩入雖不繼痛自節儉每日限用百五十自
月朔日取錢四千五百足繫作三十塊掛屋梁上平明以畫杈子
挑取一塊卽藏去杈子以大竹筒別貯用不盡者可謂至儉然猶
每日一肉蓋此間物賤故也囊中所有可支一年以上至特別作
相度日下未須慮也兒子正如所料不肯出官非復小補也信筆
亂書無復倫次不覺累幅書到此恰二鼓室前霜月滿空想識我

此懷也言不可盡惟萬萬保裔而已

九

桂砂如不難得致十餘兩尤佳如費力一兩不須致也

十

某啓近附桂州遞奉書必達邇來江淮間酷暑殆非人所堪況於
嶺外乎惟道懷清曠必有以解煩釋懣者入秋以來翛然清遠計
尊候安勝僕凡百如昨不須念及子由在高安不住得書無恙近
亦有南都來者云張公及貴聚並安見報舉者更宜省事緘口區
區之至不罪不罪馬朝請過此議論脫然必知所以待定國者展

奉末可期惟萬萬自重不一世無能然亦足以自足
某啓馬公過此嘉便無好物寄去收拾得茶少許謾充信而已新
詩文近日必更多君學術日益如川之方增幸更著鞭多讀書史
仍手自抄爲妙某自謫居以來可了得易傳九卷論語說五卷今
又下手作書傳迂拙之學聊以遣日且爲子孫藏耳子由亦了却
詩傳又成春秋集傳閑知之爲一笑耳桂州遞中有和仲奉和詩
四首不知到未且一報之

某遞中領書及新詩感慰無窮得知君無恙久居蠻夷中不鬱鬱
足矣其他不足云也馬處厚行曾奉書必便達不知今者爲在何
許且盤桓桂州耶爲遂還任耶重九登棲霞樓望君淒然歌千秋
歲滿坐識與不識皆懷君遂作詞云霜降水痕收淺碧鱗鱗欲見
洲酒力漸消風力軟颼颼破帽多情却戀頭佳節若爲酬但把清
樽斷送秋萬事回頭都是夢休休明日黃花蝶也愁其卒章則徐
州逍遙堂中夜與君和詩也來詩要我畫竹此竟安用勉爲君作
一紙奉寄子由甚安吾儕何嘗不禪而今乃始疑子由之禪爲鬼
爲佛何耶丹砂若果可致爲便寄示吾藥竒甚聊以爲閑中詭異

之觀決不敢服也張公久不得書彼必得安問乍冷萬萬以時自
重夜坐醉中作此書仍以君遺我墨書也不宜

十三

某啓如聞晉卿已召還都月給百千其女泣訴聖主爲惻然也恐
要知來詩愈竒欲和又不欲頻頻破戒自到此惟以書史爲樂比
從仕廢學少免荒唐也近於側左得荒地數十畝買牛一具躬耕
其中今歲旱米貴甚近日方得雨日夜墾闢欲種麥雖勞苦却亦
有味鄰曲相逢欣欣欲自號麤糟陂裏陶靖節如何君數書筆法
漸逼晉人吾筆法亦少進耶畫不能皆好醉後畫得一二千紙中

時有一紙可觀然多爲人持去於君豈復有愛但卒急畫不成也
今後當有醉筆嘉者聚之以須的信寄去也

十四

耕荒田詩有云家重燒枯草走報暗井出一飽未敢期瓢飲已可
必又有云刮毛龜背上何日得成氈此句可以發萬里一笑也故
以填此空紙

十五

某啓昨日遞中得子由書封示定國手簡承已到江西尊體佳健
忠信之心天日所照旣遂生還晚途際遇未可量也容采老少比

舊不帶黃茅氣色否呵呵前此發書并令子由轉去必達來教云
此月五六可到九江而子由書十一月方達今且謾遣人不知猶
及見否無絲一的爲賀引領神馳惟萬萬自愛速遣此人書不能
盡言遞中續上問也不宣

十六

以下俱
離黃州

某啓今日景繁到泗州轉示十月二十三日所惠書并新詩六首
妙曲一首大慰所懷河凍膠舟咫尺千里意思牢落可知此佳作

終日喜快滯漑冰釋幸甚幸甚某往揚州入一文乞常州住得
耗奏邸拘微文不肯投進已別作一狀遣人入京投下近在常州

宜興買得一小庄子歲可得百餘碩似可足食非不知揚州之美
窮猿投林不暇擇木也黃師是遣人往南都故急作此書仍和得
一詩爲謝他未暇也新濟甚淺凍不可行且夕水到卽起恐須至
正初方有水也不知至時公在宋否某若得請或附宣獻公舟尾
南來不爾遂泝水至西都出陸赴汝也然欲葬却乳母子出乃行
卽南都亦須住一月入夜倦迫不盡意惟萬萬自重日本水

十七

某頓首 先帝升遐天下所共哀慕而不肖與公蒙恩尤深固宜
作挽少陳萬一然有所不敢者爾必深悉此意無狀坐廢衆欲置

之死而先帝獨哀之而今而後誰復出我於溝瀆者已矣歸耕
沒齒而已

十八

某啓張公壅嗽經月未已雖飲食不退然亦微瘦數日來亦漸損
想必無慮然有書宜令勸固胃氣勿服疎利藥僕屢以勸之仍勸
夏秋間先多作善事齋僧施貧之類然後開眼公後日相見時亦
可以此勸之日夕遂與之別情味極不佳公得暇早來與之相聚
若得此間一差遣亦非小補也留意留意

十九

以下俱
翰林

某啓數日間舟馭入城適患瘡未潰坐起無聊不克修問不審起居何如既無由往見而公又未朝覲企渴不可言當以酒洗泥而久在告酒盡只有大小團密雲五餅雙井一餅亦爲高人無泥可洗爾呵呵病中不盡區區

二十

數日臥病在告不審起居佳否知今日會兩壻清虛陰森正好劇飲坐無狂客冰玉相對得無少澹否扶病暫起見與子由簡入罵書尺往還正是擾人可憎之物公乃以此爲喜怒乎仙人王遠云得此書當復刺口大罵之固應爾然而不可以徒罵也知公澹甚

往發一笑張十七必在坐幸伸意

二十一

以下俱
穎州

某啓久不奉狀辱書感慰之至此日起居何如謗焰已息端居委
命甚喜然所云百念灰滅萬事懶作則亦過矣丈夫功名在晚節
者甚多定國豈愧古人哉某未嘗求事但事入手卽不以大小爲
之在枕所施亦何足道但無所愧恨而已過蒙示諭慙汗若使定
國居此所爲當便驚人亦豈特止此而已本州職官董華密人也
能道公政事歎服不已但恨公命未通爾但靜以待之勿令中塗
齟齬自然獲濟如國手棊不煩大段用意終局便須贏也未由會

見千萬保重不宣

萬和

某啓前日欲附南京書來人不告而去因循至今比日起居何如
張丈且喜少安且令安樂幾年慰四方士大夫心豈非好事近日
都下又一場紛紛何時定乎穎雖少僻去都下近親知多特來相
看者殊倦於應接更思遠去而未能也未緣言向千萬保嗇不一

二十三

某啓近遣人奉書未達間領來誨伏承起居佳勝旋得厚之書知
從者入都想已還宋矣某見報移鄆老病豈堪此劇郡方欲力辭

而請越不惟適江湖之思又免過都紛紛未知允否老境欲少安
何時定乎未由言面苑結可知乍暖千萬保練不一

二十四

某啓人來辱書并三詩伏讀感慰仍審起居佳勝報張公臥疾不
勝憂懸急要文集不敢不付在杭二年到京數月無頃刻暇時公
屬我文集當有所刪潤雖不肖豈敢如此然公知我之深舉世無
比安敢復存形迹實欲仰副公意萬一故不敢草草編錄到頴方
有少暇正欲編次而遽索去不敢不付且乞定國一言檢閱既了
仍以相付幸也千萬保愛不宣

某啓別來紛紛未卽奉狀兩辱手教感愧深矣且審比來起居住勝爲慰爲慰公失郡去國士友所嘆然自是計少安其他無足言者某已得潁州極慰所欲但不副張公之意蓋旬日前得子開書極來相禱方安於彼不欲移也故不敢乞聞張公已安慶慰無量會合未可期惟千萬保蓄不宣

某啓自公去後事尤可駭平生親友言語往還之間動成坑穽極紛紛也不敢復形於紙筆不過旬日自聞之矣得潁藏拙餘年之

幸也自是剗心鉗口矣此身於我稍切須是安處千萬相信日與樂全翁游當熟講此理也某甚欲得南都而姪女子在子開家亦有書來云子開欲之故不請想識此意

二十七

某啓數辱書一一收領亦一一上狀知已達風俗惡甚朋舊反眼不可復測故不欲奉書畏浮沉爾不罪不罪比日起居住勝公弊屣浮名一寄之天不過淮上上回文以無爲有爾然亦未必如此但恐流俗觀望復作兩楹之說皆不足道也某所被謗仁聖在上不明而明殊無分毫之損但憐彼二子者遂與舒亶李定同傳爾

亦不足云可默勿語也餘惟千萬保愛不宣

二十八

某啓平生欲著一書少自表見於來世因循未成兩兒子粗有文章材性未暇督教之從來頗識長年養生妙理亦未下手三者皆大事今得汝陰無事或可成定國必賀我也言此者亦欲公從事於此爾書至此中心欣躍如有所得平生相知不敢獨饗當領此意不復念餘事也

二十九

公自此無憂患矣不須復過慮研銘到頴當寄上也

三十

某啓辱書具審起居佳勝誣罔已辯有識稍慰寵示二詩讀之聳然醉翁有言窮者後工今公自將達而詩益工何也莫是作詩數篇以餉窮鬼耶喜不寐詩甚欲和又礙親嫌皆可一笑也張公今雖微瘦然論古今益明不惟識慮過人定國亦可見矣人事紛紛書不盡言非面莫究

三十一

某甚欲赴樂全之約請南都而子開有書切戒不可又姪女亦有書云舅姑方安於彼不可奪也故不欲請承樂全乃爾見望讀之

極不皇且爲致此懇餘具公書矣定國云有二詩元不封示何也
公平生不慎口好誦人別後深覺斯人極力奉擠公臨行時亦自
覺僕始信之可駭也

三十二 以下離潁州

某啓高休至辱書憂愛矣比日起居何如書意欲一相見固鄙懷
至願但不如彼此省事之爲愈也馭瘴之術惟絕欲練氣一事本
自衰晚當然初不爲禦瘴而作也某其餘坦然無疑雜肉魚蒜遇
着便喫生病老死符到奉行此法差似簡要也君實嘗云王定國
瘴烟窟裏五年面如紅玉不知遂能如此乎老人知道則不如公

頑愚卽過之朝夕離南都別上狀愈遠加愛不宜

三十三

某啓別來三辱書勞問之厚復過疇昔矣衰繆日退而公相好日加所未諭也又中間一書引物連類如見當世大賢意謂是封題之誤必非見與者而其後姓字則我也尤所不諭然三復其文詞韻甚美正似蘇州何充畫真雖不全似而筆墨之精已可竒也謹當收藏以俟講此者而與之如何如何公行復舊官矣差遣亦必自如意可喜可喜但此去不知會合何日不能無耿耿也真贛輒作得數句如何可用卽令一善寫小字入代書絹上可也張公集

謝厚之字說皆未作別後日紛紛可厭可厭神膏方納上餘勤勤
自愛

三十四 揚州

張公所戒深中吾病雖甚頑狠豈忍不聽願爲致此意也公向令
作滕達道理銘已諾之其家作行狀送至此矣又欲作孫公神道
碑皆不違只告密之勿令人知是某作仍勿令以潤筆見遺乃敢
聞命來詩甚奇真得衝替氣力也呵呵故後詩未及和朝夕別遣
人并致糟淮白所欲宜興田某豈敢有愛於此等然此田見元主
昏顛某見有公文在浙漕處理會未見了絕當亦申都省也田在

深山中去市七十里但便於親情蔣君勾當爾不知在公時蔣能如此幹否更籌之

三十五

以下俱赴定州

某啓示教承起居佳勝子由疾少間惠藥感刻二方謹秘之五方續寫得納上祝鮀衛子魚賢者也佞才也以爲佞人蓋流俗之誤山梁雌雉子路以餽孔子孔子知子路將不得其死雉亦好關關喪其生故曰色斯舉矣翔而後集若此雉豈時之罪哉其餘義盡於文初無注解馬或留意少試僕子不肯已遣回一面商量可公意即可也李希元已付一簡與子中矣某適與安國說欲來早畧

到淨因令又頭昏去否未可知旱癘將作人多不安將愛將愛

三十六

某啓近者崇慶大故中外哀慕想同此悲痛某蒙被知遇尤增殞滅人來領書承起居無恙某本自月初赴任今須俟殿殯畢乃敢朝辭後會何時臨書愴恨惟萬萬自重

三十七

某啓疲曳之餘卽因睡爾尋酒對菊豈復夢見君真世外人也詩亦竒欲和而未暇使事始欲辭免又若無說然衰病極畏此後日未可預刻至時馳問也

三十八

某啓甘草已如所諭削去矣參四板聊致遠誠并一詩爲笑雪浪
齋亦求一篇爲塞上華寵厚之本欲作書適有少冗又筆凍甚
稍和暇也幸致意

三十九

某啓辱教承起居佳勝昨夕黃昏徑睡五更馬上賞嘉月爾事已
一笑出疆已有旨完夫同行也別紙已領

四十
以下俱
惠州

某啓遙中忽領三月五日手教喜知尊候佳勝貴眷各康健併解

懸情幸甚一官爲貧更無可擇知生計漸有涯可喜可喜某到此
八月獨與幼子一人三庖者來凡百不失所風土不甚惡某旣緣
此絕棄世故身心俱安而小兒亦遂超然物外非此父不生此子
也呵呵書中所論甚感至意不替疇昔而加厚也幸甚幸甚子由
不住得書極自適道氣有成矣餘無足道者南北去住定有命此
心亦不念歸明年買田築室作惠州人矣伏暑中萬萬加愛不宣

四十一

某一味絕學無憂歸根守一乃無一可守此外皆是幻此道勿謂
渺漫信能如此日有所得更做沒用處亦須作地行仙但屈滯從

狗竇中過爾勿說與人但欲老弟知其畧爾問所欲幹實無可上
煩者必欲寄信只多寄好乾棗人參爲望如無的便亦不須差人
豈可以口腹萬里勞人哉所云作書自辯者亦未敢便爾不怨天
不尤人下學而上達知我者其天乎張十七絕不聞消耗懷仰樂
全之舊德故欲其一箴之否

荅黃魯直五首

以下俱
徐州

軾頓首再拜魯直教授長官足下軾始見足下詩文於孫莘老之
坐上聳然異之以爲非今世之人也莘老言此人人知之者尙少
子可爲稱揚其名軾笑曰此人如精金美玉不卽人而人卽之將

逃名而不可得何以我稱揚爲然觀其文以求其爲人必輕外物而自重者今之君子莫能用也其後過李公擇於濟南則見足下之詩文愈多而得其爲人益詳意其超逸絕塵獨立萬物之表馭風騎氣以與造物者遊非獨今世之君子所不能用雖如軾之放浪自棄與世闊疎者亦莫得而友也今者辱書詞累幅執禮恭甚如見所畏者何哉軾方以此求交於足下而懼其不可得豈意得此於足下乎喜愧之懷殆不可勝然自入夏以來家人輩更臥病忽忽至今裁荅甚緩想未深訝也古風二首託物引類真得古詩人之風而軾非其人也聊復次韻以爲一笑秋暑不審起居何如

未由會見萬萬以時自重

二

某啓晁君騷詞細看甚竒麗信其家多異材耶然有少意欲魯直以已意微箴之凡人文字當務使平和至足之餘溢爲恠竒益出於不得已也晁文竒麗似差早然不可直云爾非謂避諱也恐傷其邁往之氣當爲朋友講磨之語乃宜不知以爲然否不宣

三
翰林

某啓前日文潛無咎見臨臥病久之間欲牽公見過所深願也便欲作書奉屈而兩日坐處苦一瘡極痛至今未穴殊無聊賴得教

并詩慰喜不已。瘡兩日當穴。又數日可無苦。諸公自可准法來問。疾然欲來。當先見語。公擇舅作憲。甚可喜。因見爲道區區。君實嘗言破題。當似日五色。莫作運啓元聖天臨兆民也。餘非面不盡。

四
以下俱
惠州

某啓。方惠州遣人致所惠書。承中塗相見尊候甚安。卽日想已達黔中。不審起居何如。土風何似。或云大率似長沙。審爾亦不甚惡也。惠州已久安之矣。度黔亦無不可處之道也。聞行橐無一錢塗中頗有知義者能相濟否。某雖未至此。然亦近之矣。水到渠成。不須預慮。數日來苦痔疾。百藥不効。遂斷肉菜。五味日食淡麪。兩椀。

胡麻茯苓麩數栝其戒又嚴於魯直雖未能作自誓文且日戒一日庶幾能修之非特愈疇所得多矣子由得書甚能有味於枯槁也文潜在宣極安少游謫居甚自得淳父亦然皆可喜獨元老奄忽爲之流涕病劇久矣想非由遠謫也隔絕書問難繼惟倍祝保愛不宣

五

某有姪婿王即名庠榮州人文行皆超然筆力有餘出語不凡可收爲吾黨也自蜀遣人來惠云魯直在黔決當往見求書爲先容嘉其有奇志故爲作書然舊聞其太夫人多病未易遠去謾爲一

言眉人有程遵詢者亦竒士文益老王即蓋師之此兩人有致窮之具而與不肖爲親又欲往求黃魯直其窮殆未易量也

荅秦太虛七首

以下
密州

某啓別後數辱書旣冗懶且無便不一裁荅愧悚之至參寥李頗聞動止爲慰然見解榜不見太虛名字甚惋歎也此不足爲太虛損益但吊有司之不幸爾卽日起居何如參寥真可人太虛所與之不妄矣何時復見臨紙惘惘惟萬萬自愛而已謹奉手啓上問諸事可問參寥而知入夜困倦書不詳悉程文甚美信非當世君子之所取也僕去替不遠尚未知後任所在意欲東南一郡爾得

之當遂相見

二

某昨夜偶與客飲酒數盃燈下作李端叔書又作太虛書便睡今日取二書覆視端叔書猶粗整齊而太虛書乃爾雜亂信昨夜之醉甚也本欲別寫又念欲使太虛於千里之外一見我醉態而笑也無事時寄一字甚慰寂寥不宣

三 湖州

某啓昨晚知從者當往何山辱示方悟以雨輟行悔今日不相從也聞只今遂行故不敢奉謁分韻詩語益妙得之殊喜拙詩令兒

子錄呈暑濕惟萬萬慎護早還爲佳不一

四黃州

軾啓五月末舍弟來得手書勞問甚厚日欲裁謝因循至今遞中復辱教感愧益甚比日履茲初寒起居何如軾寓居粗遣但舍弟初到筠州卽喪一女子而軾亦喪一老乳母悼念未衰又得鄉信堂兄中舍九月中逝去異鄉衰病觸目悽感念人命脆弱如此又承見喻中間得疾不輕且喜復健吾儕漸衰不可復作少年調度當速用道書方士之言厚自養鍊謫居無事頗窺其一二已借得本州天慶觀道堂三間冬至後當入此室四十九日乃出自非廢

放安得就此太虛他日一爲仕宦所縻欲求四十九日閑豈可復
得耶當及今爲之但擇平時所謂簡要易行者日夜爲之寢食之
外不治他事但滿此期根本立矣此後縱復出從人事事已則心
返自不能廢矣此書到日恐已不及然亦不須用冬至也寄小詩
文皆超然勝絕亶亶焉來逼人矣如我輩亦不勞逼也太虛未免
求祿仕方應舉求之應舉不可必竊爲君謀宜多著書如所示論
兵及盜賊等數篇但似此得數十首當卓然有可用之實者不須
及時事也但旋作此書亦不可廢應舉此書若成聊復相示當有
知君者想喻此意也公擇近過此相聚數日說太虛不離口莘老

未嘗得善知未暇通問程公闕須其子履中哀詞軾本自求作今豈可食言但得罪以來不復作文字自持頗嚴若復一作則決壞藩墻今後仍復袞袞多言矣初到黃廩人旣絕人口不少私甚憂之但痛自節儉日用不得過百五十每月朔便取四千五百錢斷爲三十塊掛屋梁上平日用畫叉挑取一塊卽藏去又仍以大竹筒別貯用不盡者以待賓客此賈耘老法也度囊中尚可支一歲有餘至特別作經畫水到渠成不須預慮以此胸中都無一事所居對岸武昌山水佳絕有蜀人王生在邑中往往爲風濤所隔不能卽歸則王生能爲殺鷄炊黍至數日不厭又有潘生者作酒店

樊口棹小舟徑至店下村酒亦自醇醞柑橘棧極多大芋長尺餘不減蜀中外縣米斗二十有水路可致羊肉如北方猪牛麋鹿

如土魚蟹不論錢岐亭監酒胡定之載書萬卷隨行喜借人看黃州

曹官數人皆家善庖饌喜作會太虛視此數事吾事豈不既濟矣乎欲與太虛言者無窮但紙盡耳展讀至此想見掀髯一笑也子駿固吾所畏其子亦可喜曾與相見否此中有黃岡少府張舜臣者其兄堯臣皆云與太虛相熟兒子每蒙批問適會葬老乳母今勾當作墳未暇拜書歲晚苦寒惟萬萬日重李端叔一書託爲達之夜中微被酒書不成字不罪不罪不宣載再拜

五 離黃州

某啓別後欲奉書紛紛無暇且謂卽見無所事書而日復一日遂
以至今疊辱手教具聞動止甚慰某宜興已得少田至楊附遞乞
居常仍遣一姪孫子賁錢往宜興納官蓋官田也須其還乃行而至今
未來計亦無他特其子母難別爾見艤舟竹西待之不過更三兩
日必至必能於冬至前及見公也小兒子不歷事亦微憂故不欲
捨之前去遲見之意殆以日爲歲也傳神奇妙之極贊若思得之
當奉呈也餘非而不盡不一

六 以下俱
北歸

某書已封訖乃得移廉之命故復作此紙治裝十日可辦但須得
泉人許九船卽平穩可恃餘蛋船多不堪而許見在外邑未還須
至少留待之約此月二十五六間方可登舟並海岸行一日至石
排相風色過渡一日至通角場但相風難克日爾有書託吳君雇
二十壯夫來通角場相等但請雇下未要發來至渡海前一兩日
當別遣人去報也若得及見少游卽大幸也今有一書與唐君內
有兒子書託渠轉附去料舍弟已行矣餘非向莫究

七

某啓近累得書教海外孤老志節朽敗何意復接平生欽友伏閱

妙迹凜凜有生意幸甚幸甚比日毒暑尊候佳否前所聞果的否
若信然得文字後亦須得半月乃行自此徑乘蛋船至徐聞出路
不知猶及一見否示論二范之賢不惟喜公得婿小范且以慶吾
友夢得之有子爲不死也言之淚下不已過蒙許與恐不副所期
實能躬勞辱以佚考爾令子想大成曾寄所作來否借一二亦
佳文潛無咎得消耗否魯直云宣義監鄂酒吳子野自五羊來云
溫公贈太尉魯子宣右揆的否未可知也廉州若得安居取小子
一房來終焉可也生如暫寓亦何所擇果行衝冒慎重

荅張文潛四首

以下俱
惠州

某啓久不奉書忽辱專人手教伏讀感嘆且審爲郡多暇起居住
勝至慰至慰疾久已掃除但凡害生者無復有則真氣日滋骨髓
餘益形神卓然復壯無三年之功也某清淨獨居一年有半爾已
有所覺此理易曉無疑也然絕欲天下之難事也殆似斷肉今使
人一生食菜必不肯且斷肉百日似易聽也百日之後復展百日
以及暮年幾忘肉矣但且立期限決有成也已驗之方思以奉
傳想識此意也蒙遠致兒子書信感激不可言子出在筠甚自適
養氣存神幾於有成吾儕殆不如也聞淳父魯直遠貶爲之悽然
此等必皆有以處之也某見寓監司行館下臨二江有樓劉夢得

楚望賦句句是也癩癘雖薄有然不惡與小兒不曾病也過甚有
幹蠱之才舉業亦少進侍其父亦然恐欲知之解憂爾曾合未期
臨書悵惘惟萬爲道自重不宣

二

某啓屏居荒服真無一物爲信有枕櫛方杖一枚前此土人不知
以爲杖也勿謂微陋收其遠意爾荔枝正出林下恣食亦一快也
羅浮曾一游每出勞人不如閉戶之有味也木不輟服無咎竟坐
修造不肖累之也愧忤家有婢能造酒極佳全似王晉卿家碧香
但乏可與飲者爾羅浮有道士鄧安安雖朴野養練有功至行清

苦常欲濟人深可欽愛見邀之在此又頗集醫藥極有益也曾子
開陸農師俱不免以知默定非智力所能避就也小兒承問不欲
令拜狀煩覽也

三

少游得信否奉親必不失所

四

來兵王告者極忠厚方某流離道路時告奉事無少懈又不憚萬
里再來非獨走卒中無有也願公以某之故少優假之置一好科
坐處當時與同來者顧成亦極小心今來江海者亦謹恪遠來極

不易可念愧愧

荅李端叔十首

翰林

辱書并示伯時所畫地藏某本無此學安能知其所得於古者爲
誰何但知其爲軼妙而造神能於道子之外探顧陸古意耳公與
伯時想皆期我於度數之表故特相示耶有近評吳畫百十字輒
封呈并畫納上

二 定州

某啓辱簡承起居佳勝近讀近藁諷味達晨輒附小詩更蒙酬和
益深感嘆朝夕就局中會話也

三以下俱
北歸

某六十五矣體力毛髮正與年相稱或得復與公相見亦未可知
已前者昔夢已後者獨非夢乎置之不足道也所喜者海南了得
易書論語傳數十卷似有益於骨朽後人耳目也少游遂死於道
路哀哉痛哉世豈復有斯人乎端叔亦老矣道云鬚髮已皓然然
顏極丹且渥僕亦如此爾各宜闕齋庶復相見也兒姪在治下頻
與教有一書幸送與醉中不成字不罪不罪

四

某啓辱書多矣無不達者然終不一荅非獨衰病簡懶之過實以

罪垢深重不忍更以無益寒溫之間玷累知友然竟不免累公慚
負不可言比日計赴穎昌伏惟起居佳勝眷聚各安健某移永州
過五羊徑渡大庾至吉出陸去長沙至永荷叔靜諸人照管不
甚失所叔靜拏舟相送數十里大浪中作此書無他祝惟保愛之外
酌酒與婦飲尚勝俗侶對梅二丈詩云爾

五

某啓近託孫叔靜奉書遠地得達否比來尊體何如眷聚各計康
勝某蒙恩復舊職秩領真詞世間美事復有過此者乎伏惟君恩
之重不可量數遙知朋友爲我喜不寐也今已到虔州卽往瀨間

居度多在毗陵也子由聞已歸許秉燭相對非夢而何一書便乞
達與餘惟自愛

六

子由近得書度已至岳矣養鍊極有功可喜可喜三兒子在此甚
安健不敢令拜狀黃魯直張文潛晁無咎各得信否文潛舊疾必
已全愈乎

七

朝雲者死於惠久矣別後學書頗有楷法亦學佛臨去誦六如偈
以絕葬之惠州栖禪寺僧作亭覆之榜曰六如亭最荷夫人垂顧

故詳及之得此書後幸作數字寄永通仍取兒姪輩一書爲幸

八

某啓承諭長安君偶患臂痛不能舉某於錢昌武朝議處傳得一
方云其初本施渥寺永者因寓居京師甜水巷見一乞兒兩足拳
彎捺履行渥常以飲食錢遺之凡暮年不衰尋赴任數年而還復
就曩居則乞兒已不見矣一日見之於相國寺前行走如風驚問
之則曰遇人傳兩藥方服一料而能行因以其方授渥以傳昌武
昌武本患兩臂重痛舉不能過耳服之立效其後傳數人皆神妙
但手足上疾皆可服不拘男子婦人秘之其方元只是王氏博濟

方中但人不知爾博濟方誤以虎脰爲腦便請長安君合服必驗

九

某啓濶別八年豈謂復有見日漸近中原辱書尤數喜出望外此日起居住勝某已得舟決歸許如所教而長者遽舍去深以爲恨具報除輦運似亦不惡近日除目時有如人所料者則此後端叔必已信眉矣乎但老境少安餘皆不足道乍熱萬萬以時自愛不

宣

十

某本以囊裝罄盡而子由亦久困無餘故欲就食淮浙已而深念

老境知有幾日不可復作多處又得子由書及見教語尤切至已
決歸許下矣但須至少留儀具令兒子往宜興刮刷變轉往還須
月餘約至許下已七月矣去歲在廣州託孫叔靜寄書及小詩達
否叔靜云端叔一生坎軻晚節益牢落正賴魚軒賢德能委曲相
順適以忘百憂此豈細事不爾人生豈復有佳味乎叔靜姻友想
得其詳故輒以奉慶忝契不罪不罪

與趙德麟

十七首

以下俱
杭州

候吏來特承書教禮意兼重感怍不已此日起居何如養痾便郡
得親宗彥幸甚行役迫遽裁謝草畧想蒙恕察

二

明守一書託為致之育王大覺禪師仁廟舊所禮遇嘗見御筆賜
偈頌其畧云伏覩大覺禪師其敬之如此今聞其困於小人之言
幾不安其居可歎可歎太守聰明老成必能安全之願公因語歎
曲一言正使凡僧猶當以仁廟之故加禮而況其人道德文采雅
重一時乎此老今年八十二若不安全當使何往恐朝廷聞之亦
未必喜也某方與撰宸奎閣記旦夕附去公若見此老當為致意

三以下俱
潁州

人來辱書伏審履茲畏暑起居住佳勝為慰見念之深正如懷仰之

意不肖獨賴晁無咎在此方憂其去若果得德麟爲代真天假老拙也旣未欲來此寄居常令爲於高郵尋安下處續當馳報也未間萬萬自重

四

別後思仰不可言竊計起居住勝得舍弟書奉太夫人久服藥近已康復伏惟歡慶到郡兩月公私勞冗有稽上問想未深責會合未期惟冀侍奉外千萬保重

五

昨日幸接笑語今日知舉掛聞之後時不及往慰悚息悚息三日

臂痛今日幸減錄舊詩一篇奉呈聞公亦欲借示詩藁幸付去人
上清宮成而有德音意謂守臣當有賀表如何如何謀之於公幸
畧垂示

六

某啓數日不接思渴之至衝冒風雪起居何如端居者知愧矣佛
陀波利之虐一至此耶乃知退之排斥不爲無理也呵呵酒二壺
迎勞唯加鞞加鞞

七

字說改多寫了納去背時兩葉實糊合之仍用皂綾夾標紀之一

皂綾夾之
標兩面也仍請前後各着一空葉

八

某啓欽服下風爲日久矣遲暮相從傾蓋如故非獨氣類自然抑亦夙昔緣契人來辱手教得聞起居佳勝堂上康福感慰深矣某凡百如昨又得無咎相切磨之幸德麟替後想必有殊命萬一尚未一來爲無咎交承亦佳又聞欲寄居此間可先示諭也萬萬自重不宣

九以下俱
赴揚州

惠示二詩伏讀慰抃不可言某途中及到此絕少暇止有數首不

佳又未有工夫錄去容稍積多并奉呈也今且次韻二首爲一笑

十

某啓宦遊無定得友君子又復別去悵惘可量數日竊想起居住
勝到壽淮山漸有佳思懶不作詩亦無人唱和也乍遠萬萬自重
不宣

十一

淮南夏頗熟然積欠爲害疾瘵殆未有安理浙西疲甚歲事未可

知餘非書所能盡德麟孤風超然願少貶以忍濟爲念必亮此意
此中有幹幸示及杭州買物人已回內中所欠俞君錢此有便當

先爲寄還之如遣還之可速示免重寄也滑盞得錢都正書已琢磨兼與錢訖非久必寄來卽附上

十二

文廣獄斷勅下可畧示也李尉推恩有耗否尹過案必已上古人云雷霆之下恐難獨當願掛一名以今觀之此人真難得也亦勿深恠之知穎尾夏田損半秋有望否淮南東西秋夏皆大熟亦一樂土也獄官不惟庇爲前勘乃是深爲不待結案而移司者周慮也若勘作故出則指揮移司官不得不問上下欺罔不得不令人憤憤某亦無由入文字亦有以論之恐不濟事太息而已

十三 以下俱揚州還朝

某啓魯直寄書來甚安并得少雙井今附納上蒙惠竒茗絕妙因見太守爲致意爲適病在告數日未果奉書要臨淄堂記秋涼稍暇可作也月老亦致意熱甚又多病未暇作法施堂銘不一

十四

某啓近承專使手書爲使者云往西洛還當取書故未荅辱教字具審起居住勝感慰兼集公未卽解去與俗子久處良不易然有忍乃濟願以不見不同無盡待之某到此半月無可樂者過大禮卽重乞會稽爾無緣面謝幸恕草草

十五

累辱手教感慰無量比日起居住勝大禮日近隨分冗迫未得卽
見賢者深增悵惘也乍寒萬萬以時自重

十六

紛紛尚未暇往見思企之極陰寒起居住勝否甘釀佳貺輒踐前
言作賦可轉呈安定否無事見臨幸甚

十七

辱教承台候佳勝拙疾猶未退尚潮熱惡寒也來日必赴盛會未
得後日猶恐當謁告也辱意甚寵適會如此非所願幸千萬加恕

身以集名

子出固當馳赴也穆公且喜漸安臥病書此不謹

...

...

...

...

...

...

...